

Romshucheema

Wasina pakich kamanchinllpa yuwaa Papororini Romshucheem yandarangu anootsi

Romshuch yakta tputs zapan Isusoo mangoonaranganaya. Mishat, Utaáshuch tputs ashpatam mangoonarangtamsina. Ashiriy washunand shaniyarangsin, Utaáshuchsha, Watam Apanll iyaa zitaminarini tsiyataranguwa; ashiriy siya iyaa k'kini mazinayarus tuminungtsa, tárangana Romshucheetsi. Apanllchicheetsis kinamaam zandkinaareesa, ashiriy kamuzis nutseetsis ktsupangints, watam Apanll iyashchee kamachtaranguwa. Mishat, yuwaa Apanll Móysisarinee kamachtarangu anoo ichinguru tuminungints, tárangana Utaáshuch tputs Romshucheetsi. Tsiyatstar ashirangsin, tamundarangana. Ashiriy tputssha Papororineetsi kamanirangu, ¿Tamam wanasiri? Paporo. Shiysha kamaningi, tárangu, Paporsha kirakaa yandarangiya ichinguru Romshucheema, Isuschicheem tputsi.

Ashiriya, na yuwaa kamanirangu anoo kamanchinllpa:

- A. 1.1-5: ¿Tamarimsa, Romshuchis?
- B. 1.16-17: Nuw Isusoo kuk pazikeezi, watam Isusumunari Apanll tputsee istakuwa.
- C. 1.18—3.20: Tputs ichinguru tsapurunas ztaru Apanllée niyrkana, watam yutarit taamaam zandkanawa.
- D. 3.21—5.21: Ashiriy Apanll waana ichinguroo istamaam zandarangu, Isusoo zanganirangiya. Na Isusumand waminu iyaa yarkiya.
- E. 6.1—8.39: Apanll na Isusumun iyaa kis chinaku, iyaam taarashish kaneesich panakiya wanasiri taamaama.
- F. 9.1—11.36: Itaru Apanll Utaáshuchee tputs wand chinakiya. Natumasamta niyramana niyrkiya, watam Isusoo ngatkanawa. Itaru, yuwash zari waritakchu anush Utaáshuch ichinguru Isusumun mang' tatuchpasinaya. Apanllsha ichingurusin tapachindachiya.
- G. 12.1—15.13: Itaru, siya Isuschichis saanpatatis chinakus istangtsa. Chinangtsa. Utaáshuchtaatis taakus, tunartaatis taakus, ashtaa saanpatatis natsarintspa. Chinangtsa watam Apanll anoo kis napkuwa.
- J. 15.14-33: Apanll nuwaa ipusarangiya tunareetstaa tayapstamaama. Ashiriya, siyaatstam tayapstamaam zandkitamana. Sfru mapeeranguri, siyash napamaam pinasarangtana. Itaru natsha, Apanll nuwaa istachu, musásiriparee napchintspa.
- I. 16.1-27: Siyaa ichingurootsis chinaktana. Nishuch tputs siyaatstam chinakanaya. Nuw Apanllpat tsiyatkuri, uru siyaa istamaam tsiyatkina Isusoo kuk izuuru mangoonamaama.

Tárangiya Papororini.

Papororini kirakaa Romshucheem yandarangiya

1 ¹Isuschichis ¿tamarimsa, taaris? Nduntaa siyash pakuri, ashiritaa chinakina siyaatsi. Nda mbizakina. Nuw Papori siyaam Romshucheemis kirakaa yandayaruri, zanganchintspa.

Ísúkirísut nuwaa kamachtayaru, Nuwaa kuki tayaspatashincha, táyaru, nuwsha anuri tayaspatampaneemari taakina. Isusoo kamankuri, Apanll Wip^a tpu-tseem kinayaru, iyaam yutaritshishirini

^a 1.1 Isáysa 42.1 tsiyatsis nipta tatsamooru taaritamta.

tachingamaam tsiparangiya ántaruri taakina. ² Sirútama, ndatuma Isus tputseem kinachu, Apanll: Ipareetsi zanganchina, tárangu, yuwaa Isus kuschu anoo wasina Apanll kamanimapanirinee tuyandarangiya. ³ Ashirucha, tárangu anoo na tuminurangcha. Isus tputseem kinayaru, nish tsapurunasush kusarangu, Dapiyarinchichish nllurtarangiya. Yuwaritam, tárangiya anooritam ashirangiya atina. ⁴ Mishat, tárangitamta; Ipari izuuru ituyamachina, tárangiya. Izuurita tsipayaru, Apanlleeru Wip támarangiya. Apanll waanpata wizpur ituyamarangiya. Ashirangu anumun na yasakiniya; Isus Apanlltanda Wipa; atiniya. Uru kurak kizpur taakiya táchinlliniya. An watacha Ísúkiristu Apanlli Wipa, an iycha Kurakarini atina. ⁵ Ashiri Isus waana nuwaa chinarrangu, kamachtarangiya. Tputsee ichinguru nuwaa kuki kamaningcha arapcheetstaa, tárangiya. Mazinayarusin, Isusoo kuk mangooneersin, payukinaareesinaya ashiru, nuwsha nayanikuri, tapachindachima, tárangiya Apanlli. ⁶ Ashirucha, anuri mazinayaruri, nuwsha siyaam Apanllchichis mangoonamaam yandayaruri zanganchinllpa. Siyaa Romshuchis Isustischa tiptsiri, watam mangoonak-sawa. ⁷ Arapcheetstaatis Apanll wanasir taapana átu, siyaa tiptsireem ínarangiya. Ashirucha, Apanllchichis Romap yakta taakis anoomis yandakina.

Ashiri Aparini siyaa wanasir napchiya; mangooz mapiyamaam siyaam panachiya. Kurakarshitini, Ísúkirísut, siyaam ashchitamtaya atina.

⁸ Ichitaru, táchintspa Isuschicheetsis. Ashiri nuw mangi kisha yuwamand Apanlle chinakis anumanda. Ashirucha, Apanlle wapparee tina. Watam siy Isusush kis tachitkis anoo tputs ichinguru siyaa mazinarangana. Romshuch Isusoo kisha mangoonkana, átsincha siyaatsi. Ichingurusin kung' tána. ⁹ Apanllpat uru ichinguru zari siyaam tsiyatkina. Apanll waana pakcha, watam zurumarpati Apanlle payukinawa.

Isusoo kuk kis kamankina. Tputseem shuneeru Isusoo mangoonpana aturi, ashkina. ¹⁰ Apanllpat tsiyatkuri, Apaa, ¿ashinoo Romshuchip napchi? tina. Siyap musaa napati turi mashkina. Apanll waana zandku, nuwaa siyap zanganichparee. ¹¹ Siyangaz Isuschichingazis pamaam kizpur zandkina. Apanlle aranginasha mangoonpana aturi, kamaniti aturi, anungaz zandkina. ¹² Apanlle mangoonamaam yaanpatatini istapi tina. Nuwsha tayapstataruri, siyaa tayapstatarus, yaanpatatini istachiniya arangeem mangoonamaama. Ashtapi turi siyap napamaam zandkina.

¹³ Ashiriya, zuwanlee siyangaz kizpur chinakina, napati turi. ¿Wanipa zari Romshuchingazis pangassi aturi, támaraki? Uru atitaati, xapookina. Isusumun kuk xarakuri, mapeekuri nda pakina. Siyaam Apanlle kuk aranginasha mangoonpana aturi, siyaptam kamaniti tina. ¹⁴ Tputs ichingurusin Apanlle mangoonpana tina. Yaktashchitam, misha kungumunutam wing' taakana antam, kirakaa yasakana anootstam, kirakaa nda yasakana anootstam, ichingurusin mangoonpana aturi, kamankina. Watam Isus nuwaa kamachtarangawa. Ashirucha, tayaspatakina.

¹⁵ Ashirucha, siyaatstamta Romshucheststamtis izuururi Isusoo tayaspatapi turi támarakina. Siyash napamaam kizpur zandkina. Ashirucha, yuwash Apanll waana zandku anush napchintspa.

Mazinangtsa; yuwaa Apanll: Tputs Isusumun mang' taktu anoo kis napchima, tárangu anoo kapung yandayaruri zanganchintspa

¹⁶ Isus kuk kizpurcha tina. Isusoo tsiyatssis wanasirimshee kamankuch, tputs zuraktischa átu, zurku payuku, Apanll Yashingoo tatutsikcha. Utaáshuch mangoonku, tatutsik, arapchitaa tputs mangoonku, tatutsikamcha. Uw kuk kizpurcha. Ashirucha, nda nuw paziki kamanimaama; tputsee ishuneeri

kis kamankina. ¹⁷Ndunnaa Apanllee kuk mangoonkuch, Apanll chiyaa kapeetkiya. Itaru, chiy Isusoo mangoonkuch, Apanllsha chiyaa mangich izuuru yar-chiya; chiyaam taarashish urutamashi panakiya. Watam Apanll yandamarini atuwa; Tputs nuwamun mang' tatku, nuwsha mangoo yarchima; taarashish panachima, táranguwa Apanlli.

Anoo siyaam kapung kamanpi aturi yandakina.

Mishat, kamanchintspa; yuwaa Apanll nda mangu tputsee wanichu anootsi

¹⁸Nitaati Apanll tputsee mangutari wanitareeja; nduni. Itaru, Apanll íwarpichi yutaritamapanee wanitariya. Yashingchich Apanllee ngatkusin, yutari taatsim chinaku, tputsee tuxarakanaya. Yarusinapa atusin, tsiyatssis zurumamshée sarichkana. Ashirucha, anu-mandari Apanll waneekiya. ¿Tamaree nda Apanll anumand wánich? ¹⁹Watam Apanllee yasamaam kamiranawa. Ashiri tputs tsapurunasish ztaru mangoonamaam waritakcha. Waritaktaa, ashiritaa ngatkana. ²⁰Nduntaa Apanllee paksin, manutsshartaatstaa, itaru tinamarineetsini pamaam waritakcha. Yuwamun Apanll tsapurunasee tinarangu anumun Apanllee yasamaam waritakiya. ^bApanll wamari kasiriya; uw minamariticha Apanlliya. ¿Mayaamshta ayamtaatiya Apanll kuskachu anush tputs: Apaa, shiyaa natstarangeezi, ashirucha nda shiyaa mangoonarangí, átu tách? Atinaari, wayangichireem waanaatsi ínachiya. Ashirucha, yuwamand tákchu anumand Apanll wanichparee tina.

²¹Uwshtisin ngichzeetsim payuksin, Apanllee natstakitaatssin ngatkanaya. Waatssin istaktaa, Wapparee, Apaa, shiy kizpurtishcha, átazinllinaja. Mangsharít ashirusin mang' sarichta sarichta ashkana. Muxareempaz ashirusin, waanaatsi ínakana. ²²Mangini kapungcha, atitaat-

ssin, mangshartaw taakana. ²³Apanll kiz-pureetstaa, matspashimasheetstaa kasa-yarusin, misha múchashimasheetstaa kasayarusin, yuw Apanll tinambarangu maacheetstaa anootssha in wattanacha iy aparini atanaya. Nda Apanllleetsimari chinaksin, waantin mangu maachi tsiripich, misha pshiyrataru an, misha maachi manginshuch tumuz tamaparee ashiru tinayarusin, anoo Apanllirineemi ínakana. ^c

²⁴Ashirucha, Apanllsha: Waani yachap, tárangiya, watam wand Apanllee mapiykanawa. Yuwaatsimari piyari chinakana anootsimari payukanaya. Aranginasha yutarit taak'sin, pazikazinllinaja. Waanaatsi yutaritam ínakana. Waanpatatin yutarit patatkana. ²⁵Apanllee zurakcha átazinllinaja nduni. Ngichzee kis payukana, watam tputs waanaatsi tinamarini: In watacha Apanlli; tánawa. ¿Tamashtaj apanllputseetsinasha ungirtachich? Apanlleetsinacha ungirtamaam waritasha.

Ashiri yuwamand tputs uru ashkana anumand Apanll wanichparee atina.

²⁶Ashirucha, Apanll tputsee xapooyaru, Waani yuw zandkana anu ashtapana, tárangiya Apanlli. Waani waanaatsi yutaritam ínachinlliniya, tárangiya. Táyaru, kiztisin kamuzaa kasayarusin, waanpatatin kizaptatin chchakanaya.

²⁷Kamuztisin ashiritam kizaa kasambeer-sin, waanpatatin kamuzpatatin tumuxkanaya. Ashiri kizpur muxareem kinak'sin, waanamand chayarini waanaatsi kiyung yachakanaya. Ashkitaa tayukazinllinaja. Wandari Apanllee ngatakanaya.

²⁸Ashirucha, Apanllee ngatkusin,

Apanllsha: Waani yachap yutarit taak'sina, táyaru, muxareem kinakana.

²⁹Yutaritshishee ichinguru chinak'sin, Yashingush kis tachitkana; shambatkana. Waanpatatin tputsee kiyung yachakanaya; támarak, shuchik, yatsak, pachak, waratak, tamapingak, tputseeewa

^b 1.20 Salmo 10.1 tsiyatsis nipta tatsamooru taaritamta. ^c 1.23 Tayusima. 4.15-18; Jeremiyasa 2.11 tsiyatsis nipta tatsamooru taaritamta.

ngichik, aship ichinguru ashkanaya. ³⁰Tputsee yutarit tsiyatkusin, yutaritam ínakana. Mishat, Apanllée natsakana. Tputsee mantsir yámkusin kamasta ashkana. Mangutari kukpat tsiyatkusin, waanaatsi ungirtakana. Mangush zapan chinak'sin, piyartachee yaspatakana. Yutaritshishee chinakana. Wapareetssin kuk nda payukana; mazinazinaw ashkana. ³¹Mangshartawa taakana, mangoonamaam zandkazinllinaja. Mangu ashchinipa táyachusín, mangu tamapingakanaya. Tputsee chinakazinllinaja; nayanimaam zandkazinllinaja. Kiyung yachakanaya. Kaapa kizpur yutaritanand taakana. ³²Apanll tputsee yuw ashkana anoo wanitarcha; xapta-reeja; tsipataarcha. Apanll waneeyantspa atitaa, tputssha anoo mazinarangitaatssin, wand aranginasha yutarit taakana-ya. Waanipa wanichindaniya; punikeezi, atana. Piyartacheetstam yutarit taamaam kis yaspatakana. Yutaritshishinga-zimari uru chinakanaya.

Ashirucha, Apanll msanguru wanitareeja atina. Yuwaa yutarit taakana anumand wanitariya. Ndunnaa Isusumun mangich tat kuch, kamungamaam nduncha, táshina.

**Itaru, tputs waanamuna wizpuririni
nda kamungchiya atina**

2 ¹Ashpatam tputs atana; Ashiri nuwna kamungachshaparina, watam an tputs tamapari ashiruri nda kizpur yutarit taakinawa; atana. Itaru, nuwsha táshina; tputs titaatiya, waana chayarini taaritamta. Waa wanimaam waritamta. ²Apanll itsinsaru natstakia. Waneekchu anush nda minumtiyam tputsee mamarpachiya. Tputs nda kamungchiya, nuwsha tina. ³Uwnaarsin yutaritssincha atitaa, ¿waana yutaritam taakuwa? ¿Apanll piyartacheewa waneekchu, uwaatsinashtaja nda wánich? ⁴Mishat, shiy ngutish Apanllée

niyraksha. Apanllsha chiyaa kizpur chinaku, nda musá waneekiya. Yutaritshishee kasayamasa átu zanariya. ¿Ashiri mayaamshta chiy Apanllée ngatchich? ⁵¿Mayaamshta wand yutaritshishee chinachich? ¿Mayaamshta ngat ngat ashchich? Papcha, Apanll chiyaa aranginash wanichiya. Isus yusur kuskachu, Apanll tputsee ichinguru wanichiya. Mang'pa itsinsaru natstayaru, tatsamooritam wanichiya. ⁶Yutarit taaku anoo tsiyantachiya. Wanasir taaku anoo kis napchiya. ^a ⁷Tputs wanasirinaari taaku, Apanllingaz chinaku, Apanll: Shiy wanasirtishcha; urutamari taachsha. Shiyaa chinakina, kis napkina, watam wanasir taakshawa; táchiya. ⁸Itaru, tputs Apanllée kuk kapeetkinaari, piyari chinaku, yutaritshishee kis payuku, Apanllsha kizpur nambkachu, ¿Mayaamshta nuwaa ngatarangsha? Shiyaa tsiyantakina. Na shaani yachachsha; kizpur wanchinllpa, táchiya tputsi yutarit taaku anootsi. ⁹Táyarú, tputsee wanichiya. Tputs kiyung kachiychiya; sitatsti táchinllinaya. Tputsee waneekchu, ¿tamaree Utaáshucheetsim wánich? Arapcheewaa tputs wanichtamparee. Tputseets ichinguru wanichima, Apanll atiya. ¹⁰Itaru, tputseetssha wanasiri taaku anootssha: Shiyaa chinakina. Kayun mapiyruni taapani, táchiya. Utaáshucheets, misha piyartacheets tputs ichinguru wanasiri taakana, anootstam táchiya. Apanll: ¿Tamaru taaranganaya? táchiya. ¹¹Apanll tatsamooru chinaku, tatsamooritam waneekiya. ^b Nda minamtiyam tputs waanamuna wizpuririni kamungchiya atina. ¹²Sirú Apanll zitamarineetsi Móysisarini kamachtamarinee tuyandayaru, Tputsireetsish nee tayaspatatar ashkush, payuchinllinpa, tárangiya. Itaru, arapcheets tputs tayaspatamaam nda kamachtarangiya. Ashiritaa, Apanll tputsee waneekchu, tatsamooru wanichiya. Tputs

^a 2.6 Esekiyela 18.30; Esekiyela 33.20 tsiyatsis nipta tatsamooru taaritamta.

^b 2.11 Tayusima 10.17; Ipísshucheema 6.9 tsiyatsis nipta tatsamooru taaritamta.

Apanlee kamachtamarini yasaranginaari ashiru, yutarit taaku, Apanllsha: Nuwaa kuki yasarangitaatish, ¿mayaamsha nda payurangsha? táyaru, wanichiya. Mishat, tputs Apanlee kamachtamarini nduntaa mazintarusin anoo Apanll: ¿Mayaamsha yutarit taaksha? táyaritam wanichiya.

¹³Tputs Apanlee kamachtamarini mazinaktaa, nda payuku, ¿nitaati Apanll ksaja anoo napach? Itaru, tputs payukinaari kamachtamarini, anoo izuuru Apanll kiska napchiya. ¹⁴Arapchitaa tputs nduntaa Utaáshuchsín, Apanlee kamachtamarini nduntaa mazintaru, ashpatam wanasir taakana. Waantari mangush chinaku, ashkanaya. ¹⁵Watam Apanll waana tputsee wanasir taamaam tamang'taku, An yutaritcha, misha an wanasircha tát ashku, tputsee mang' p'tseekiya. Ashirucha, yuwaa yutarita taaku anoo natstakchiya. Yuwaatssha wanasirimshi taaku anoo natstaktamta. ¹⁶Ashiri Isus wanimaam kuskachu, tputsee ichinguru natstayaru, wanichiya. Tputs yutaritshishirineetsini kamapshiktaa, Isussha natstakchu, wanichiya. Apanll waana shingi tákchu, Isussha wanichiya.

Ashirucha, tputs nda minumtiyam kamungachparee atina. Ndunnaa Isusumun mangich tat kuch, kamungamaam nduncha; nuw siyaa táshina.

Mishat, Apanll iyashcheetstam Utaáshucheetstamani wanichiya tina

¹⁷Mazinangtsa; iyaanshuchee Utaáshuchee kamanchintspa. Apanlee kamachtamarini wirkari kuwishini kis payukaniya, watam: Nimandparee Apanll iyaa kis napchiya; atiniwa. Apanlleetsimari chinaktaa; atiniya. ¹⁸Apanlee kamachtamarini kapung mazinaranguni, yasakani. Apanll zandku anoo yasakani. Mishat, yutaritshishee kamiran natstakaniwa; wanasiree natstaktamaniwa. ¹⁹Mishat, tputseem Apanlee mangoonamaam kamiiran tayaspatakani. Arapcheetstam tputs tayaspatakini.

²⁰Tayaspatampantana atiniya. Mangshartawa tputs waneekani. Nlluraa

tamapari ashiru anoo waneekani. Ashiri iyashchini Móysisarini kuk kapung mangoonarangini; ichinguru yasakini; Nuwaam Apanll kuk pishtakeeja, atiniya.

²¹Itaru, ¿mayaamsha iy mangoonkinaareeniya ashiru, nda yaana kukoo payukanee? Tputsee tayaspatakitaateeni, ¿mayaamshta nda yaana mangoonkinee? Sh'chirinllpa atitaatini, yaana shuchikitamaniya. ²²Imbangartarinllpa atitaatini, itaru yaana kis anoo zandkitamaniya. Apanllputsee natsaktaatini, yutarita titaatini, itaru Apanlleetsinasha niyrkitamaniya. ²³Yaanaatstana ngichkuni, Iy Apanlee kamachtamarini yasantanicha; ngutini atiniya. Ashiritaa nda payukanee. Ashirucha, ashku, Apanlee sura itsachtaktanicha táshina. ²⁴Watam Apanll kuk atuwa. Yuwamand Utaáshuch yutarit taakana anumand piyartach tputs Apanlee natsaksin, mantsir tsiyatkusin, Apanlee chinamaam ngatkanaya. Ashirucha, amb ashishtang ashkuni, ¿tamaree Apanll nda iyaa Utaáshucheetsini wánich? nuw atashina.

²⁵Ashiriya, Apanlee kuk payukuni, nda kapeetkuni, Apanllsha iyashchee istachiya. Itaru, Apanlee kuk kapeetkuni, nda payukuni, ¿tamaree Apanll istach? Ashirucha, Apanll iyashcheetsam Utaáshuchee nambeeru wanichparee; atashina.

²⁶Ashiriya, arapich tputs nduntaa Apanlee mangoonarangu, mangoonkachu, Apanlee kuk payuku, Apanllsha kis chinachiya. Tiptsireem ínachiya arapcheetstaa tputs. ²⁷Ashiri iy Utaáshuchini Apanlee kuk mazintaritaatini, nda payukuni, Apanll aranganasha wanichiya. Itaru, arapich tputs nduntaa Apanlee kuk mazintaru, ashiritaa mazinayaru payuku, Apanllsha kizpur istachiya. ²⁸Iy Utaáshuchta nllurtama Apanlee kamachtamarini payuruni, nutseetsini ktsuparangitaatini, ¿nitaati anumun kaapana Apanlleem tiptsiri kinatartaranginee? ²⁹Apanlee yandamarini payuktaatich, itaru ngutich k'k'iptich mangoonkuch, ¿mayaama wanasiri? Itaru, tputs mang'

tachingamanaariya, Apanlee kuk izuuru payukuch, annacha Apanll tiptsiri.^c Apanll Wani chiyaa mangich yarkiya. Anootsina-cha Apanll kis napchiya. Tputs nduntaa anoo kis napku, Apanll anoo kis chinakiya.

Ashirucha, iy Utaáshuchini Apanlee kuk nda payukuni, Apanll iyaa wanichiya tina. ¿Watam iy sirútari mazinaringiniwa? Ndunnaa Isusumun mangich tatkuch, kamungamaam nduncha, táshina.

3¹ Ashiriya, uwshtisini Utaáshuch yámkusin, nuwaa táchpasinaya. ¿Ashiri iy mayaamaja Utaáshucheeem kinarangini? ¿Mayamunaja nutseetsini ktsuparanginee? ngutpariniya ashirangini. ¿Watam Apanll iyaa Utaáshucheesini wanichu átschawa? táchpasinaya nuwaatsi. ² Itaru, nuwsha waa: Tárintspa táchparina. Iyaa waneekchitaa, ashiritaa, iyaa Utaáshucheesini kizpur chinakiya. Watam Apanll iyaatsima waanaatsi kuku kamaniranguwa. Anumand iy Utaáshuchini kasiruni taakini; táchparina.

³ Apanll iyaaam Utaáshucheeemani waanaatsi kuk kamanirangtaa, nda ichinguruni anoo payurangini. Ashpatamani Apanlee kuk kapeetarangtaatini, itaru uwnaa Apanllina uru waanaatsi kuk payukchu, iyaa Utaáshucheesini uru istachiya. ¿Tamaree nda istach; watam istachima, táranguwa? Itaru, yaantari waa kuk kapeetaranginiya. ⁴ Tputsich ichingurutichcha wayangichirirtichcha, itaru Apanll ngichtareeja. Watam Waana Apanll atuwa;

Shiy ichinguru yasayarush, ngich-zish nduncha.

Shiy tsinastishcha.

Shiy tputsee waneekchush,

¿Chaka shiyaa, yutarittishcha tách?^a tárangiya Apanlli. Yuwaa, tárangu anoo ngichimaam wanindaja.

⁵ Itaru, waanari Utaáshuch ngichku nuwaa táchparee; ¿Tamaree Apanll nuwaa wánich? Napa nuw yutarit taakuri, tputs-

sha: Shiy yutarittishcha. Nuwna anoo zandkeezi, táchparee. Ashiriya, nuwamand yutaritshishiri tputs Apanlee kamiran mangoonachpasinaya. Ashiri ¿maya-mandaja Apanll nuwaa waneeku wánich? Watam nuwamand tputs Apanlee mangoonkusin, nuw Apanlee istakpaz ashkinawa; Utaáshuch ngichku táchparee nuwaatsi. Itaru, nuwsha táchina; ⁶ Nduni, tárinllpa. An k'kuz sarichimamishcha; ngichizcha anu. Utaáshuch zurkinaari átu, ashiri tsapurunasshuchee ichinguru nduntam wanimaam waritakiya; atina. Itaru, Apanll itsinsaru natstakchu tputsee ichinguru wanichiya, atashina. ⁷ Itaru, uwsha Utaáshuch wandaritam táchparee; Nuwamand yutaritshishiri tputs Apanlee wanasirimshirini kamiran mangoonachparee. Ashkuri, Apanlee ungirtakina. Ashiri ¿mayamandshtaja Apanll nuwaa waneeku wánich? táchparee Utaáshuchi tputsi. ⁸ Itaru, nuwsha atina; Tputs atinaari ashiru kizpur sarich sarich ashkiya, watam yutaritshish wanasircha atuwa. Yuwamand atana anumand waana Apanll kizpur wanichiya; ¿yapeeja kamungach? Ashpatam tputs nuwaa mangu ngichkusin, Papor: yutaritshish wanasircha mang átscha nuwaa tána. Waani ántemasa.

Nitaati yutarit taakuch, anu wanasireeja. Yuwamand átu anumand Apanll waneekchu, waana yasachinllinpa; atina nuwa.

⁹ Ashiriya, Isuschichis mazinangtsa. Ichinguruni tputsini yutaritanandani taakaniya; nda Apanlee kuk payu-

kaniya. Iy Utaáshuchtaatani piyartachee tputs minamtiyam kasireezini, watam tatsamooruni yutarittamaniwa.

¹⁰ ¿Apanll kuk amka?
Nda minumtiyam tputs wanasir taakanaya.

¹¹ Mang' nduneersin, nuwaatsimari chinamaam nda zandakanaya.

¹² Napkuri, ichingurusin yutarit chinkaksin mantsir taakana,^b

^c 2.25-29 Tayusima 10.16 tsiyatsis nipta tatsamooru taaritamta. ^a 3.4 Nishuri yuwartatam Salmo 51.4 átu atitamta. Mishat, Salmo 116.11 tsiyatsis nipta tatsamooru taaritamta.

^b 3.10-12 Salmo 14.1-3 tsiyatsis nipta tatsamooru taaritamta.

Apanll átcha.

¹³ Mishat, tputs

wayangichirirnandsincha.

Tputsee tamapingakanaya.

Tputsee yutaritam ínakanaya.

Uru zarungchamamari taakana.

¹⁴ Uru tputsee mantsir tsiyatkanaya.

Ngichzeetsimari tsiyatkusin
taakanaya.^c

¹⁵ Natsamamari taakana; páchar sista-
ngat ashkana,

átcha Apanlli.

¹⁶ Mishat, uru tputsee kiyung yachaka-
na; nayanikazinllinaja.

¹⁷ Uru kundartarsin taakanaya; nda
mapiyrsin taakana.

¹⁸ ¿Apanlee chakaja punipuntapu?

atusin, mapiyrusin taakanaya,

átcha Apanlli. Apanll zurku atiya, watam

ashimanandaniwa. ¹⁹ Ndamba yasartam-

sa, Utaáshuch tputs ichtaru Apanlee

kamachtamarini mazarangana. Itaru,

yasarangitaatssin nda payurangana.

Yuwamand yutarit taarangana anu-

mand wanimaam waritakiya. Apanll

waneekchu ¿amireeja Utaáshuchstisin

yámchinllina? Ashiritam tputs ichingu-

ru ztaru yutaritanandsin zamarutarusin

yámmaam wanindtamtaja. ²⁰ ¿Ndusha

mangoonkis? Nitaati minamtyam tputs,

Apanll nuwaa kis napchiya, watam

kamachtamarinee ichinguru payukina-

wa; tácheeja. Támaam pinasakcha. Itaru,

Apanll kamachtamarini mangeetsich

p'tseekiya yutaritshishee yasamaama.

Mazinayaruch, Maa, nuw tamakina, tách-

pachi. Ashiriya, yaanamand yutaritshi-

shirinimandini Apanll iyaa wanichiya.

Ashiri yuwaa Apanll tputsee nda

mangutari wanichu anoo kamaneena.

**Itaru, zuwanlee, misha tsiyatssis
kamanchintspa; yuwaa Apanll chiyaam
Isusush kamungamaam wayarangu anoo**

²¹ Natunaa Apanll wazaree kamankiya.

Apanll waantari Isusumand wamin chi-

yaa yutaritshishireetsich yarkiya. Ashiri
mazinangtsa.

Iy Apanlee kuk payupani atitaatini,
xapoorangini. Ashirucha, yuwamand
xapoorangini anumand waanaatsi wip
iyaam istamaam zanganirangiya. Isusu-
mun mangini tatkachuni, Apanllsha chi-
yaa kis chinakiya; iyaam xarashish ndun-
shacha. Yuwaa ashtachu anoo Apanll
wasina yasarangu, zitaminarineetsi
kamanimapani tuyandarangiya, ndatuma
Isus kuschu. ²²⁻²³ Anoo na siyaa kamanki-
na. Tputsini ichinguruni yutaritanandani.

¿Chakaja Apanllpat tatsamooch? Ndu-

cha. Ichinguruni pishtakaniya.^d Itaru,

iy Isusumun mangini tatkinaareeni,

Isusumand wamin Apanllsha iyaa yutarit-
shishirini izuurumamari kapeetarangiya.

²⁴ Nduntaa yaanamand yutaritshishirini

tuwaparanguni, Apanll iyaa mangutari

istakiya. Waantari mangush chinayaru,

Ipari waana tuwapachpa átu, ashirangi-

ya. ²⁵ Apanll Ísúkirístoo iyaam kamung-

shini zanganirangiya. Isusoo yasinamun

tapamtarangusin, kiyung kachiyeeru, tsi-

parangiya. Ashirucha, iyaam wanimaam

waritaktaa, itaru Isusumun mangini

tatkuni, Apanll mangeetsini Isuspat ursiri

tachingachu, mapiykiya. Ashiri natunaa

tputsini ichinguruni, Yungparipa Apanll

iyamand kamini ashirangiya, táchin-

ya. Sirú Apanll zitaminaa nayanirangu,

natumasamaam mangutari yutaritshi-

shee naparangiya. ²⁶ Itaru, natpurumsha

iyaam Apanll tputsee ichinguru yarap

átu, Isusoo tsipamaam zanganirangiya.

¿Ndunnaariya Isus tsiparangu, ashireeja

chiyaa mangeetsich yarach? Ashiriya,

chiy Isusumun mangich tatkuch, Isu-

sundam wamin Apanll chiya yutarit-

shisheetsich izuuru kapeetkiya. Ashiri

waneeshi izuuru mapiykaniya yuwamand

iyaa tsiparangu anumanda.

²⁷ Isusumun mangini tatkuni, Apanll

iyaa yutaritshishirini izuuru mbizakiya.

¿Ashiri: Apaa, nuwaa kis napangandama,

^c 3.14 Nishuri yuwartatam Salmo 10.7 átu atitamta. ^d 3.22-23 Salmo 130.3 tsiyatsis nipta tatsamooru taaritamta.

watam k'keetsish kamachtamareetsish izuuru payuraginawa; táchich? Nduni, támaam pinasakiya; watam xapookaniwa. Yuwamand Isusumun mangini tatkini anumand iyaa yutaritshishirini izuuru kapeetkiya. ²⁸Tputs Apanlee kuk izuuru payumaam pinasakanaya. Ashiri Apanllimun kamachtamarini mangini tatumaam nduncha. Itaru, tputs Isusoo mangoonku, anootscha Apanllsha izuuru kis chinakiya. Ashirucha, anuri chinangtsa.

²⁹Mazinangtsa; ¿nitaati Apanll Utaáshucheetsimani chinak? tputsee ichinguru ztaru chinakiya; ³⁰tatsamooru chinakiya. Utaáshuchini Isusumun mangini tatkini, Apanllsha kis napkiya iyaatsi. Piyartachsha tputs Isusumun mang' tatkinaariya, ksatam napkiya. Ashiri waanandari chinakiya.

³¹Itaru, siysta: Isusoo mangoonkuni, Apanlee kamachtamarini yuw Móysisarini kamachtarangu anu ¿mayaama payuchich? Kpitanda ácha; táchpasa. Watam nda Apanllimun kamachtamarini kamungachchiwa; táchpasa. Itaru, támana tárintspa. Isusoo mangoonkuch, aranginasha Apanlee kamachtamarini payuchchi; ancha kizpur wanasiri atashina.

Ashiri yuwaa Apanll chiyaam kamungsheemani wayarangu anoo pakchim kamaneena.

Minootssha aranginasha kamanchintspa; yuwaa chiy Apanllimun mangich tatkuch, Apanllsha chiya kis napku anootsi

4 ¹Isuschichis mazinangtsa, zitaminaa Apramarineetsi pakich kamanchintspa. ¿Mayamandaja Apanll Apramarineetsini kis naparanga? Anoo na yasayanimani. ²⁻³Apramarini Apanllimun kizpur mang' taturangiya. Anumand Apanll, tárangiya;

Shiy nuwaa kuki mangoonarangush, ashirucha nuw shiyaa kis napkina,^a

tárangiya Apanlli. Nitaati Apramarini: Apaa, shiyaa kamachtamareetsish payuranguri, ashiri shiysha nuwaa kis napanangandama, tárangeeja. Nduni. Ashiri yuwamand Apanllimun mang' taturangu anumandari Apanll Apramarinee kis chinarangiya. ⁴⁻⁵Natpur Apanll iyaa ashchitamaya. Tputs nda waanamuna wizpuri mang' nda tatku, itaru Isusumunari mang' tatku, Apanllsha waa yutaritshishini kapeetkiya. Uru ashkiya ichingurootsich. Napa: tputsee tupatangayaruch, uwsha wanasir tarawaztaku, Natu: tarawaztarangi anumand tuwapanda taachiya. Itaru, Apanlleem ashkeeja. ¿Nitaati yuwamand Apanlee kamachtamarinee payukich anumand Apanll chiya yutaritshishireetsich tachingkeeja? nda. Itaru, yuwamandari Isusumun mangini tatkini anumandamari Apanll chiya yutaritshishireetsich tachingamaam waritakiya.

⁶Yuwaatstam áti anootstam Dapiyarini kamanirangiya. Tputs wanasiri taamaam xapooyaritaa, Apanlleetssha: Apaa, mangeetsi tchingangandama, tákchu, Apanllsha mango tachingchu, kishsha Apanll waa napchu, tputssha mapiyshapa taachiya. Dapiyarini, tárangiya;

⁷⁻⁸Apanll tputsee yutaritshishirini tachingeeru, izuuru mbizakchu, tputssha mapiyshaparee taachiya. Tputs yutaritshishirineetsi Apanlee kamanku, nda kamapshiku, Apanllsha izuuru tachingeeru, ndusha yusur anoo chinachiya,^b

tárangiya. Ashirucha, Isusumunari mang' tatku, Apanllsha chiya yutaritshishini kapeetkiya atashina.

⁹Mazinangtsa; ¿nitaatiya Dapiyarini Utaáshucheetsimari tsiyatak? Ichinguroo tputs Dapiyarini tsiyatarangiya. Watam waana Apanll atuwa; Shiy nuwaa kuki mangoonarangush, ashirucha nuw shiyaa kis napkina;^c Apanll tárangiya. ¹⁰¿Nitaati

^a 4.2-3 Nishuri yuwartatam Apanll chtarangu 15-6 átu atitamta. ^b 4.7-8 Nishuri yuwartatam Salmo 32.1-2 átu atitamta. ^c 4.6-9 Nishuri yuwartatam Apanll chtarangu 15.6 átu atitamta.

yuwamand Apramarin wanutsee ktsuparangu anumand Apanll mangoo tachingarang? nda. Ndunimastaa ktsuparu, Apanll yutaritshishirinee kapeetarangiya. ¹¹ Apanll ichtaru Apramarineetsi yutaritshishirinee kapeetarangiya. Anumunsha: Nutseetsish ktsupangi, watam shiyaa tputsirinawa; Apanll Apramarinee tárangasha. ¿Nitaati Apramarini wanuts ktsuparangu anumand Apanll mangoo yarararang? nda. Itaru, yuwamand Apanllimun mang' taturangu anumand Apanll yutaritshishirinee tachingarangiya. Ashirucha, iysha Apramarini tamarangpari ashiruni Apanlee mangoonkuni, Apanllsha iyaa mangeetsshitini yarkiya. Iysha nduntaa nutseetsini ktsupkuni, Apramarinchichtanicha, táchiniya. ¹² Utaáshuch tputs wanuts ktsupama, Apramarini tamapari ashiru Apanlee mangoonku, Apanllsha anoo mangoo tachingkiya. Apramarinchichtanicha, táchtamsinaya. Ashirucha, ktsupamaam yusur chinarintspa; Apanllimunari mangis tatungtsa nuw siyaa táshina.

¹³ Apramarini Apanllimun mang' taturangu anumand Apanllsha yutaritshishirinee tachingarangiya. Sheeru, Apramarineetsini Apanll: Ichinguru tsapurunas shiyachcheem ngutariti panachintspa; tárangiya. Nitaati yuwamand Apramarini kamachtamarini payurangu anumand Apanll panachintspa, tárangeeja, nduni. ¹⁴ Kamachtamarinimand atinaariya, Apanllsha mangutanaaparee, tárangiya. Iyaamsha ashiritamta. Apanllsha mangutari iyaa istamaam zandkiya. Yuwamand tputs Apanlee kamachtamarini payuku anumand Apanll mangoo tachinginaariya ashiru, iy ngutpariniya Apanllimun mangini tatini. Itaru, ashkeaja. Watam yuwamand nuwamun mangish tatkish anumandari yarchinllpa, táranguiwa. ¹⁵ Mazinangtsa; Apanllimun kamachtamarini mangich tatumaam pinasakchi kamungamaama. Kamachtama ndunnaariya taaru, mapiyamaam waritariya. ¿Mayaatseeja kapeetchich? ¿Itaru, watam taaruwa? Ashiru-

cha, tputsich kamachtama payumaam pinasakuch kapeetkachuch, anumand Apanll tsiyantayaru, wanitariya.

¹⁶ Itaru, Apanllimun mangini tatkuni, anumandari iyaa mangoo yarku, istakiya; watam istachintspa, táranguiwa. Waana zandku, tputsee ichinguru istakiya; iyashchee Utaáshucheetsini yuwini Apanlee kamachtamarini yasakini anni istakiya. Mishat, piyartacheetstam istakiya. Mangutari chinaku istakiya. Chiy Apramarin tamapari ashiritam mangoonkuch, Apramarinchichtanicha, támaam waritakiniya.

¹⁷ Watam Apanll Apramarineetsi, táranguiwa;

Arapich tputs zapan, Apramarinchichtanicha, ayamta shiyaa ántachinllinaya, Apramaa, tárangiya Apanlli. Apanll táyaru, Apramarinsha: zurakcha, táyaru, Apanllimun mang' taturangiya. Iysha Apramarini tamaparee ashiru mangoonkinaareeniya ashiru, Apramarinchichtanicha támaam waritakaniya. Ashirucha, Apanllimun kamachtamarini mangich tatumaam pinasakchi kamungamaama; nuw siyaa táshina.

Mazinangtsa; ndatuma Apramarin wip wanindaru, ashiritaa yuwaa Apanll tárangui anoo payurangiya. Apanll Taarashipancha; tsipareetstaa ituyamatariya; táyaru, Apanllimun mang' taturangiya.

¹⁸ Ashiri Apanll Apramarineetsi:

Wachinataatish, tsiparpaz ashirush taakush, ashiritaa iparinachsha; iparish taachiya. Shiyachich tputsirish izapaneeksini taachinllinaya, mang, tárangiya Apramarineetsi. Apramarinsha Apanlee kuk payurangiya. ¿Tamaree ashchich? tárangeeja, nduni. ¹⁹ ¿Tamaree nuw wachinachuri iparinachi? tárangeeja. Apanll Taarashipancha; tárangiya. Apramarini masachirini zapantaa, misha wizanllsha Sararini masachirini zapantam mipshimuna, tsipamaam waritarangitaa, Apramarini Apanlee kuk mangoonarangiya. ²⁰⁻²¹ ¿Tamaree Apanll ashich? tárangeeja.

Itaru, Apanllimun aranginasha mang' kizpur taturangu, Apara, shiy xapta-reezish, ichinguru shiyaam kamirana, watam taarashipanshawa, átu, Apanllee ungirtarangiya. ¿Tamaree Apanll waanaatsi kuk kapeetach? ¿Tamaree ashtachima táyaru, nda ashtach? tárangiya. ²²Ashirucha, Apanll: Shiy nuwaa kuki mangoonarangush, ashirucha nuw shiyaa kis napkina;^d tárangiya. ²³Nitaati Apramarineemtaja tsiyatssee tuyandarang, nda; iyaamtam mangoonamaam Apanll tuyandarangiya. ²⁴Itaru, Apanll iyaa nuwaa mangoonpana átu, Apramariineetsi kamanirangiya. Watam iysha Apanllimun mangini tatkuini, yuwamun kurakarini Isus tsipareetstaa ituyamataru anumun, ashirucha anumand Apanllsha chiyaatstam mangich tachingkasha. ²⁵Iy yutarit taakani anumand Apanll Isusoo tupcharangiya. Itaru, iyaa mangleetsini izuuru tachingamaam Apanllsha Isusoo ituyamarangiya. Ashiriya, Apanllimun mangini tatkuini, Apanllsha iyaa yarchiya tina. Ashirucha, anuri mangoonangtsa nuw siyaa táshina.

Mishat, yuwaa Apanll iyaa kis napku, natsha nda pazikurini, Apanllpat mapiyruni taakani anoo kamanchintspa

5 ¹Ashirucha, na Apanll iyaa Isuschicheetsini yaranguru, Apanllpat mapiyruni taakaniya. Na in Isusumun Kurakarimunni mangini tatkuini, izuuru tatsuyakani Apanlleetsi. ²Ashirucha, Isusumun mangini tatkuini, Apanllee ndusha pazikani. Watam Apanllee tatsuyayaruni iyaa kis napkuwa. Apanll iyaa chinakiya, ashirucha Apanll uru iyaa istachiya tina. Ashiri na in mangini kisshita; uru Apanllish kis taachiniya atiniya. ³⁻⁴Itaru, nda anumunari mangini kisa. Yuwamunatam kiyung kachiykini anumuntam mangini kisa. Watam kiyungunasha kachiyeeataatich, ashiritaa nda sambaytachchiwa. Nduunaa sambaytakuch, aranginasha Apanllee mangoonkuch,

chiysha Isusoom kis kutachchee chiyaa ituyamamaama. ⁵Itaru, nda ngutari-tich kutachchi. ¿Antaati mangu ateeja? zurampatari atiya. Watam iyaa kizpur chinaku Waanaatsi Wani iyash mangini tapshtukuwa. Ashirucha, uru Apanllush kis taachiniya; atashina.

⁶Mazinangtsa; yaani kamungamaam pinasarangini. Itaru, Apanll iyaa chinaranguru, iwash zari waritakchu anush Isusoo zanganirangu, yutaritshishpanee-maní tsiparangiya. ⁷Chiynaa tputseem wamin tsipacheezini, nduni. Uru tsipaneetsich pachindtarchi. Tputsee kizpuritaa chinakuch, tsipaneetsich pachindamana pachindtarchi. ⁸Itaru, Apanll iyaa kizpurcha chinaranguru. Iy yutarita taakuni, anumand nda Apanll Wipaa pachindaranguru, tsipamaam zanganirangiya. ⁹Iy sirú yutaritamuntaatani, Apanll iyaa zapan istaranguru, ¿natunaashtaja; Isuspatanasha ursiri chiyaatachingkachu, Apanll chiyaat wáneech? Watam Apanll iyaa Isusumand wamin chinakiya. Isusumunpa chiy kamungachchi.

¹⁰Watam Apanll waana iyaa undararimunta taarashee wayaranguwa waanshuta. Yuwamand wip Isus tsiparanguru yusur támarangu anumand na misisinashacha waamatanasha tiptsir kinaranguni, ashiri kaapanasha chinakiya. Ashirucha, na in iy kamungamtanicha atuni, mangoosksashish payukshiniya. ¹¹Isusungaz wamin Apanllpat tatsuyayaruni, Apanll iyaa mapiyrangasha; anurisha kis chinarangiya. Ashirucha, iysha shambatkini. Apanllee wapparee tiniya.

Ashiri yuwaa Apanllpat mapiyruni taakani anoo kamaneena. Ashiri anuri chinangtsa táshina siyaa Romshucheetsi.

Mishat, yuwaa Atagarinimuni yutaritshishee iyaa tupatstarangitaa, Apanll iyaam Isusumun taarashish wayarangu anoo kamanchintspa

¹²Ashiriya, zuwanllee, mazinangtsa. Sirútamasa zitaminarini Atagarini Apa-

^d 4.22 Nishuri yuwartatam Apanll chtaranguru 15.6 átu atitamta.

nlee kuk kapeetarangiya. Kapeeteeru, yutaritarangu, tsipats tupatstarangiya. Minamaritaa tputs yutaritarangu, iyaamsha ichinguroomshitiini yutaritshishee tupatstarangu; tsipats iyashtam kusarangu. ¹³Ndatuma Móysisarini Apanllee kamachtamarini yandachu, uru tputs ichinguru yutaritanand taarangana. Itaru, Apanll kamachtamarinimand nda tputsee waneerangiya, watam nda kamachtamarineetsini mazinaringanawa. ¹⁴Itaru, yutarit taarang'sin, tsiparangana. Nduntaa Atagarini kaapa tamarangparee Apanllee kamachtamarinee kapeetarangsin, itaru yutarit taarang'sin, tsipamana tsiparanganya. Atagarinshini tsipats chtarangu, nda pastaku, urutari tsipatsiptarusin, Móysisarinpursha urutarittam tsipatsiptar ashirangu; yaanamand chayarini tsipatsiptangatuni taakaniya.

Nitaati Isus Atagarini tamapari ashirangeeja. ¹⁵Atagarini Apanllee kuk kapeeteeru, tsipatsee iyash ichinguru tupatstarangiya. Atagarini tsipatsee wayarangitaa, Isussha taarashee urutamash ee iyaam wayarangiya. Isus Atagarineetsini wamari kasiriya. Iyaa ksumish chinarrangu, nayanirangu, taarashish urutamash ee iyaam panarangiya. ¹⁶Atagarini minamta, Apanllee kuk kapeeteeru, Apanllsha Atagarinimandani tputsee ichinguru waneerangiya. Itaru, Isusumand ashkeaja. Tputsini zapantaatani yutarit taaranguni, Isusumand waminu Apanll iyaa yutaritshishirineetsini kapeeteeru, iyaatssha kis napkiya. ¹⁷Ashiri tputs minamtaata, tsipatsee shuneeru tupatstarangiya. Itaru, Isusumun minamtamuntaa taarashish urutamash Apanll panarangiya. Atagarini yutarit taarangu, Apanllsha tputseem ztaru waneeshish wayarangiya. Itaru, Apanllsha iyaa nayanirangu, Isussha iyaam kiyung kachiyarangu, yutaritshishee tachingarangiya. Iysha Isusoo mangoonkuni, Apanllsha iyaa kis napeeru, taarasheemani urutamash ee panarangiya; Isuspata taarashish uruta-

mari kasiru taachini. Kurakpaz ashiru iyaa inayaru, waanpata kis taachiniya.

¹⁸Ashiri Atagarini minamtaata tputsee shuneeru tupatstarangiya, watam waana minamtaata Apanllee kuk kapeetaranguwa. Itaru, Isus minamtaata tsiparangu, taarashsheemani ichinguroomani kasarangiya. Ashirucha, Isusumun wanaserimshirinimun chiya yutaritshishirinee izuuru kapeetarangiya. ¹⁹Ashiritam, tputs minamarita yutaritarangu, yutaritshishee shuneeru tupatstarangiya. Itaru, Isussha minamtaata Waparee kuk payurangu, taarashshee iyaam ichinguroomani kasarangiya. Ashirangu, Apanllsha iyaa yararangu, iyaa kis napkiya.

²⁰Apanll: Tputs waanaatsi yutaritshishirineetsi yasapana átu, sirútamasa waanaatsi kamachtamarini kamani-rangiya. Kamaneeru, Móysisarinsha anoo yandarangiya. Tputs mazinayaru, mangu p'tseeyaru, yutarittana, táchinllinpa átu, Apanll kamachtarangiya. Ashirucha, Apanll kamachtamarini iyaa yutaritshishirini p'tseerangiya. Itaru, Apanll iyaa ksumish chinarrangu, aranginasha nayanirangiya. ²¹Sirú yutaritshishish pzapaneerangu, tputsee kasiyaru, tputs ztaru yutaritshishimun tsipataranya. Na ashikshitaja. Apanll iyaa ksumish chinaku, nayaniku, wanaser taapana tiya. Ashiri Isus mangeetsini yareeru, iyaam taarashshee urutamash ee wayakiya. Isuspat urutamari taachiniya, watam Isus wamari kasiruwá.

Ashiri yuwaa Apanll iyaam taarashish urutamash ee wayarangu anoo kamaneena.

Mishat, táchintspa; ¿tamaree yutaritshishee chinachini? tina. Watsta; anoo chinarintspa nuw siyaa táshina

6 ¹Ashiriya, watam ashpatam tputs atanawa; Waritakcha, watam yutarit taakchuch, Apanllee: mangeetsi tachingangandama, átouch, tachingkuwa. Chiya nayanikcha. Ashiri yusur chiy yutarit taakuch, aranginashapa chiya nayanichiya, atanawa. ²Nduni,

¿tamaree Isuschichich átu anoo payuchich? Apanll iyaa yutaritshishirineetsini tachingeeru, kapeeteeru, ¿mayaama yusur yutaritshishee chinachini? Isus iyaam tsiparangu, iysha mangini taturanguni, yaanapaz tsiparangu ashirangani. Ashiri ashiranguni, ¿tamaree yutaritshishush taachich? Pinasakshtiniya. ³Ndamba yasasa, Isusoo mangoonkuni tputs iyaa Isusumun ichumakiya. Isus nuwaa yutaritshishee kapeetamaam tsiparangu atuni, chumakaniya. Isuspapaz ipunuruni tsipakpaz ashkiniya. ⁴Ashirucha, táshina; Apanll waanamun wizpur Ísúkiristoo ituyamarangiya. ¿Tamaru Apanll ashiranga? Iyaam wanašir taamaam ashirangiya. Ashirucha, Isusumun chumakuni, Isuspazini ashkitamaniya. Watam Isus tsipayaru, tumanarangsini, támeeru, chizyayaru, shitungarangiya. Iysha, yuwini mangoonkuni, ashikpaz ashkitamaniya. ⁵Ashiri yuwini mangoonkuni anni Isuspapaz ipunuruni, yutaritshishee kapeetamaam tsiparangu ashiranguni, Isuspatatam urutamari taachini.

⁶Ndamba yasaraniya, Isuspat tsipampaz ashkini. Isus yasinamun tstsammun tsiparangu, Apanllsha taarashsheetsini sirapchee izuuru kapeetarangiya. Ashirangu, ¿tamaree yutaritshish iyaa urutari kasistar ashtach? atina. ⁷Tsiparangepazini ashiranguni, iyaa yutaritshishirini tatutsirangiya yutaritshishee mapiyamaama. ⁸Itaru, Isuspat tsiparangepaz ashiranguni, nimun taarashsheetsini kaneeschiri Isuspatarisha uru payuchiniya. ⁹Napa; Apanll Isusoo ituyamarangu, ayamtaatiya yusur tsipacheeja; tsipamaam izuuru pinasakcha. ¹⁰Isus tsipayaru, yutaritshishee izuuru kapeetamaam tsiparangiya. Minamari tsipayaru, ¿mayaama yusur tsipaku tsipach? Watam Isus támeeru, urutamari Apanlleemsha taakiya. ¹¹Ashiri siyashingtsa. Mangishish chinayarus, yutaritshishee izuuru watsta táyarus, taarashee sirapchee mapiyurus, Apanllimunarisha taangtsa. Watam Ísúkirísut iyaam tsipa-

yaru tamaranguwa. Ashiri Isusumun wizpuririni taachiniya. Ashirucha, taarashsheetsini sirapchee mapiyngtsa nuw siyaa táshina.

¹²Paptsa, yutaritshish siyaa kaseeyantspa tina. Kizpurtangtsa. ¿Mayaama yutaritshishee chinachich? Watsta. ¹³Nutseetsis Yashingoo pchindangtsa. Watam yutaritaatsim kamachtakuwa. Itaru, Apanlle nutseetsis pchindintspa. Shiyamari taapi, taarashsheetsimari kaneeschee payumaam zandkina, tángtsa. Watam Isuspata washunand tamarangepaz ashiranginiwa taarashsheemari kaneesich yamaama. ¹⁴Atinaareesa, yutaritshish ndusha siyaa kasichiya. Sirú yutaritshish siyaa kasirangu, Apanlle kuk payuyini, tárangitaatis, xapoorangsa. Itaru, natunaa Isusoo mangooneerus Apanllsha siyaa kis chinaku, ¿tamaree yutaritshish siyaa kasich? nuw siyaa atina.

Ashirucha, taarashsheetsimari kaneeschee payungtsa nuw siyaa táshina.

**Mishat, yuwaa sirú siy Romshuchis
yashingchichimuntaatis, itaru
natsha Apanllsha tiptsiris taakis
anoo kamanchintspa**

¹⁵¿Ashiri tamacheezich? ¿Yusur kanapeeruch, Yashingush tachticheezich? Watam na in iyaa Apanll nayani, mangutari istarangiya. ¿Ashiri yutarit taamaam waritachparee, táchich? Nduni, ¿tamaree táchich? ¹⁶¿Chakshum tachtitamaam zandaksa? ¿Chakaatsi kurakareemis ínaksa? Saana sangtsa. Wanda Yashingush tachtitamaam zandkinaareesa, muchchureempa kinatssa. Wanda Yashushumari tachtitachinaareesa, tiptsireem kinatssa. Itaru, Yashingush tachtikus, Yashingoo kuk payukus, yutarit taatssa. Yashingush tachtikus, saana tsipatsee yachtatssa. Itaru, siyana Isushumari tachtikus, waa kuk payukus, tsasiri taatssa. Ashkinaaris, Apanll siyaa kis napchintsa.

¹⁷Itaru, zuwanlle Apanlle wapparee tina, yuwamand Isusoo mangoonkis

anumanda. Sirú Yashing' siyaa kasirangi-
taa, nat'sha Isusoo chinaksa. Apanlee
kuk mazarangus, shambateerus, zuru-
marpatis payurangsa. ¹⁸ Apanll siyaa
Yashingush tachitamaam itutsirangiya.
Natunaa wanasiririsha taamaam chinak-
sa Apanlleema. Watam Apanlleemarisha
ksutaksawa.

¹⁹ Itaru, siyaa mangeetsis p'tsimaam
zandkuri, kamirana anoo kamanchints-
pa. Mazinangtsa; sirú yutaritshishee
chinarangus, anungaziri támara-
ngsa. Yutarit taarangus, aranginash
aranginash ashirangsa. Itaru, nat'sha
Apanlleetsimari chinangtsa. Wanasir
taamaam zandkus, Apanlee kuk arangi-
nasha aranginasha payungtsa. Ashkus,
Apanlleemari chinakus taatssa. Tsasari
taatssa.

²⁰ Sirú yutaritshishee chinarangus,
Yashingshumari tachitarangus, wanasir
taamaam mapiyrangsa. ²¹ Itaru, ¿yuta-
ritshish mayaam wanasiree? Wanasiree-
ja; watam yutarit taarangis anumand
paziksawa. Watam ashkuch uru tsipa-
tarchiwa. ²² Nat'sha ndusha yutaritshish
siyaa kasikastachiya. Itaru, Apanlleema-
ri taakus, tsasiri taatssa. Anuri ashishtar
ashkus, Apanllsha siyaam taarashish
urutamash panachiya. ²³ Itaru, tputs
yutaritaatsimari chinaku an tsipakchu,
waana yachchiya. Itaru, Apanll iyaam
taarashshee mangutari panakiya. Yuwa-
mand Isusoo mangoonkini anumand
taarashshee urutamash panakiya.

Ashirucha, yutaritshishee izuuru wats-
ta tángtsa; nuw siyaa táshina.

7 ¹ Isuschicheetsis mangeetsis
p'tsimaama pindanakpaz ashiru
tayaspatachintspa.

Móysisarinee kamachtamarini yasa-
k-tampasa. Tputs wand kchitanaariya,
anoo payumaam waritariya. Itaru, tputs
tsipakchu, kamachtamarinsha pastam-
paz ashkiya. Ndamba anoo yasasa.
² Mazinangtsa; Móysisarini wirkari
ateeja; Kiz wazaranll taarinaariya, anuri
ksutachpa, tiya, itaru wazaranll tsipak-
chu, nllitaritsha kamuz ksutamaam

waritariya. ³ Ashirucha, ndatuma waza-
ranll tsiparu nllitari tputs pakinaariya,
yutarit taaku; imbangartakiya. Itaru,
wazaranll tsipakchu, yusur zaranlleeru,
¿chakaja tsiyatach? Watam kamachtama-
rin sirapuch pastayanlluwa.

⁴ Ashkpaz ashiritamta siyaama Apanll
sirapuch kamachtamarini; siyaam pasta-
yanlliya, watam Isusshumari tachitaksa-
wa. Isus siyaam tsiparangu, siya Isusoo
mangoonarangus, Isuspat washunand
tsipakpaz ashirangsa. Taárshish sirapuch
pastayanlliya. Ashiri nat'sha Apanlleem
wanasiri taapani átus, Isusoo ksutakpaz
ashiksa yuwaa Apanll ituyamarangu
anootsi. ⁵ Sirú Apanll kamachtamarini
yutaritshishee payurintspa, tárangitaa,
ashiritaa yuwari zandarangani anuri
payurangini; yutarit taarangani. Ashi-
rucha, Apanll iyaa tsipatspa wanichints-
pa, tárangiya. ⁶ Itaru, natunaa Isusoo
mangoonarangurini, waneeshshee kamu-
ngarangani, watam Isusush tsipakpaz
ashiranganiwa. Sirú Apanll kamachta-
marini iyaa kiyung yacharangiya. Itaru,
nat'sha mangini yareeruni, Apanll Wani
iyaa istaku, Isusootsimari kis chinaka-
niya. Ashirangucha, Apanll kamachta-
marini iyaam pastarangiya. Ashirucha,
Isusshumari tachitkiniya.

Wapparee kamaneena yuwaa siy Rom-
shuchis Apanlleem tiptsiris kinarangis
anootsi.

**Minootssha kamanchintspa, yuwaa
Isusoo mangoonkitaatini, yutaritshish
iyaa uru kasimaam zandku anootsi**

⁷ Mazinangtsa; yuwamand Apanll
kamachtamarini iyaa yutaritshishee
chinarinllpa átu anumand yutaritshi-
shingaz támartariniya, watam yutarit-
shish iyaa uru kasimaam zandkuwa.
¿Ndunnaariya, táragu ashireeja
yutaritshishee natstarangini? Ashiriya,
¿Apanll kamachtamarini amcheezich?
Yutaritparee, watam kamachtamarinee
yasaranguni, aranginasha yutaritshishee
nazandaranganiwa. Kpitanda áлча,
¿táchich? Nduni, ¿tamaree táchich?

Wanasircha kamachtamarini. Wanasiri taamaam waneekiya. Napa ndunnaari kamachtamarineetsi yasaranguri, yutaritshishee nduntam natstarangina. Apanll: Tputsingaz maachiritaa támararinllpa; tárangiya. Ashiri yuwamand amb, táragu anumand nuwsha támarashee mangoonarangina; yutaritcha, táragina. ⁸ Itaru, anoo k'kuz mazinaranguri, mangishi yutarit chinaranguri, nazandaranguri, maachingaziri kapung támararangina. Apanll kamachtamarini ndunnaariya ashiru, mapiyrangparina. Ashirucha, uw kamachtamarini mangeetsi p'tseerangiya tina. Tputsich ichinguru ashimanandichcha. ⁹ Mishat, nllurtamasi mapiyruri taarangina. Itaru, Apanlleetsha kamachtamarini mazinayaruri, yutarittana, tsipachinda yutaritshishimuna, táyaruri, ndusha mapiyruri taarangina; mangi mantsarangina. Tputsich ichinguru ashimanandichcha. ¹⁰ Sirútamasa Apanll tputs wanasir taapana átu, Móysisarineetsi tuyandarangiya. Apanll waana tuyandarangitaa, wanasir taapana, tárangitaa, nuwaani payumaam xapoorangina. Waa kamachtamarini kapeetaranguri, Móysisarinsha kuk nuwaa tupchakpaz ashirangiya, watam yutaritshishish nuwaa tupantsaranguwa. ¹¹ Kamachtamarineetsi yasaranguri, nuwaanitari wanasiri taapi, táragina. Itaru, nuwaanaats tamapingarangina. Watam tputsich pinasakchiwa. Xapoorangina; ashiri yutaritshishee chinaranguri, yutarit taarangina. Ashirangi anumand Apanll tsipatspa nuwaa wanichiya; táragina. ¹² Itaru, ashiritaa, Móysisarini kuk wanasircha tina. Itsinsaru iyaa kamankiya. Wanasir kamachtakiya. Watam Apanll waana tuyandaranguwa. ¹³ Ashiriya, mazinangantsa; Apanll kamachtamarini iyaam yutaritcha, watam iyaa tupchataruwa; ¿tácheezich? Nduni, ¿tamaree táchich? Apanll yutaritshishee kizpurcha yutarita, táragu, tputs anoo mangoonpana átu,

anoom Móysisarineetsi tuyandarangiya yutaritshishee p'tsimaama. Mangeetsini p'tseerangu, yutaritshishee natstaranguni, yutaritcha atiniya.

¹⁴ Ashiriya, Móysisarini kuk wanasircha. Uru payunda átcha, watam Apanll tuyandaranguwa. Itaru, iy tputsini yutarittanandanicha. Iy uru yutaritshishee chinakani. Yutaritshish iyaa m'chachurtakpaz ashkiya; uru iyaa kasiamaam zandkiya. ¹⁵ Apanlle kuk payupani atitaatini, itaru pinasakani. Yutaritshishee watsta yutarittareema titaatini, anurisha payukani. ¿Tamashta ashkini? tiniya. ¹⁶ Ashiri Apanll kuk wanasircha tini, watam chinakaniwa; payupani tiniya. Chinaktaatini, yutarit taakani. ¹⁷ Nduntaa yutaritshishee zandkuni, ashiritaa yutarit ashkini. Yaani wanasir taamaam pinasakaniya; yutaritshish iyaa kasikiya. Iyaa tsutakpaz ashkiya. ¹⁸ Mishat, iyash wanasir taamaam waniandaja. Uru kamiran yutaritaa chinakani. Wanasir taamaam zandkitaatini, itaru yaani xapookani. ¿Pinasakaniwa? Wanasir taangsi titaatini, uru pinasakani. ¹⁹ Yutaritshish iyash taaratarawu, machikpaz ashkiya. Ashirucha, yutaritshishee watsta titaatini, anurisha tuminikini. ²⁰ Ashiri mangishini yutaritshishee kaapa ngatkini. Itaru, yaani wanasir taamaam pinasakani; yutaritshish iyaa kasikuwa.

²¹ Wanasiri taapani titaatani, iyaa yutaritshish kasiku. ^a ²²⁻²⁵ Kaapa mangishini zurumarpatini chinakuni, Apanll kuk chinaktaatini pinasakani, watam wizpuririni pishtakuwa. Wanasiri taapani titaatani, pinasakani. Yutaritshish iyaa kiyung yachakiya. Iyaa muchchureem ínakiya. Mangishini taarataraw ashikpaz ashkiya. Sitatstee. Kiyung kachiyikini. Yutaritshish iyaatsim kasikanda, wanasir taapani atitaatani. ¿Chakaja iyaa tapachindach? atinaareeniya, Isu-soomari iyaa tapachindachindaniya; táchiniya. Anumand iysha: Apara, shiy

^a 7.14-21 Salmo 51.5 tsiyatsis nipta tatsamooru taaritamta.

kizpurtishcha, wapparee, táchiniya. Kurakaranimuni Ísúkirístumun kamungamaam waritakiya. Ashirucha, Apanlee ungirtakaniya; nuw siyaa tina.

Ashiri yuwaa yutaritshish iyaa uru kasimaam zandku anoo kamaneena.

Mishat, yuwaa Apanllimun Wani wanasir taamaam waritakani anoo kamanchintspa

8¹Iyaa uru wanimaam waritaktaa, ashiritaa Isusumuncha kamungkini. Isusumand wamin Apanlleem wip kinaranguni, iyaam na waneeshish wanindshtaja. ²Apanlleem wip kinakchuni, Apanll Wani taarashishee kaneesich iyaam panakiya. Ashkachu, ndusha Yashinguni iy tiptsirini. Apanll yutaritshishee iyaa itutsku, yutaritshish ndusha iyaa kasikiya. Nduntam tsipats pzurtarich an wanindachiya. ³Sírú ichinguruni Apanlee kamachtamarini payumaam zandarangtaatani, xapoorangini. Yaani kamungamaam pinasarangini. Itaru, Apanll kamungshish taap átu, waana wipaa zanganirangiya. Isus tputseem kinayaru, iyaam kaminni kiyung kachiyarangiya. Iyamand yutaritshishirini tuwapaamaam Apanll wipaa tupcharangiya. Isus ursir parungarangu, tsiparangu, iyaam kamungshini ashirangiya. ⁴Kamachta-mareetsi payupana átu, Apanll ashirangiya. Ashiri Apanllsha Wani mangeetsini p'tsih p'tsih ashishtar ashku anoo ayu tuni, Apanlleemsha taakani. Itaru, taarasheetsini sirapchee payukuni, ancha pinasakani. ⁵Watam chiy taarasheetsich sirapchee payukuch, yuw chaana zandkich anootsim payutarchi. Itaru, taarashishee kaneesich payukuch, Apanll zandku anootsim payukchi, watam Apanll Wani chiyaa machkuwa. ⁶Apanll Wani iyaa mangeetsini p'tsiputstar ashku, machikpaz ashku, anshuri tachitkuni, iyaamsha waneeshish nduncha; mapiyshish iyaam wayakiya; taarashsheemich uru payuchchi.^a Itaru, chaanamuna wizpuririch taakuch, tsipatsee chaana yachachchee,

watam taarashsheetsich kanatsipachchiwa. ⁷Yuwaa chaana zandkich anootsimari chinachinaw ashkuch, Apanlee kundartakpaz ashikchi. Anpat uru mapeekuch, Apanlee kuk payukeezich; payumaam pinasakcha. ⁸¿Ashkich anoo tamaree Apanll kis napach?

⁹⁻¹⁰Apanll Wani siyash izuurinaariya taaku, Apanllchichtischa. Itaru, nda Apanll Wani tputsish izuuru taaku, nitaati an tputs Apanllchicheeja. Itaru, siy Apanllchichtischa; watam Isus siyash taakuwa. Nutsis yutaritshishimand tsipamana tsipakchitaa, kanis urutamari taachiya; watam Apanll siyaa mangeetsis tachingaranguwa. ¹¹Tsipakchitaa, Apanll Waanamun Wani ituyamachints; watam Isusoo ituyamaranguwa. Apanll Wani siyash taakinaariya ashiru, siyaa ituyamachiya Apanlli.

¹²Ashiriya, Apanll iyaa Isuschicheetsini waama tiptsir ínananllu, ¿mayaamshtaja Yashingush tachitchich? ¿mayaama yutarit taachich? Watam Isus iyaam kaminni kiyung kachiyaranguwa. ¹³Yutaritanaari taakus, Apanll siyaa kapeetchiya. Itaru, Apanllimun Wizpuririni yutaritshishee izuuru watsta átus, urutamari taatssa. ¹⁴⁻¹⁵Yuwaatsimari tputs Apanll Wani machku an Apanllchichcha. ¿Sírú Apanlee tamaranginiya? M'chach upaturunaree punik'sin, tamatarparee ashiranganiya, Apanlee puniranginiya. Watam yutaritshishpanimunniwa. Itaru, natunaa Apanll waanaatsi wipaampaz ashiru iyaa ínarangu, Apanll Wani iyash pshtukchu, ndusha Apanlee punikuni, iysha Apanlee: Apaa, támaam waritakaniya. ¹⁶Ashirucha; Apanlltana wipi, atuni, uwsha Apanll Wani iyash taaku an, zuraktischa, Apanllchichtischa, táchinya iyaatsi. ¹⁷Ashiri zapshina Apanllish kizpur taachini; kishshaparee taachiniya. Iyaa pachindkeeja nduni. Tatsamooruni Isuspat taachiniya. Watam Apanlltamani wipiniwa. Nish sitarunasish Isusungaz wamin kiyung kachiykuni, uwsha kuska-chu, kurak ashiruni Apanllip taachiniya.

^a 8.5-6 Esekiyela 36.27 tsiyatsis nipta tatsamooru taaritamta.

¹⁸ Ashiri Isuschichini kiyungutaati kachiykuni, ¿mayaamshtaja mangich mantschich? watam shamangashish taachuwa. Natumari sitarunasish kiyung kachiykiniya; itaru Isus kuskachu, Isuspa Apanllip taakchuni, urutarishaparee kis taachchi. ¹⁹ Anoom kis kutakaniya iya. Yusur Isus kuskachu, Apanllini wipini uwapat washunand kurak ashiruni taachiniya. Tsapurunasish maachi ichinguru Apanll tinarangu an anoomtam kutakiya. ²⁰⁻²² Natumasam Apanll tinamarini ichinguru tsipatsiptar ashkiya. Maachi ichinguru kuchakiya. Sirútamasta kiyung kachiyshish chtarangiya; na in anuritam kiyung kachiykanaya. Ashiri maachi ichinguru Apanlleem kutakaniya. Istangasinda átssincha. Ashiri zapshina Apanll ichinguru kaneescheem tinachiya. Apanllchichee kurakaam ínakchu, ichinguru múchashimash tinachiya. Anoomsha kutaktamsinaya.

²³ Iysha anoomtam kutakaniya. Isus musá kusachpa, nutseemani múchashimash kinangsinda, atiniya. Isusup kárkachuni múchashimasheem iyaa ínachshitaya. ¿Waanaatsi Wani iyash tapshutyaru, iyaa tamareeja nda wipaam izuuru ínach? Ashiri Apanllip Isuspat kis taachiniya. ²⁴ Waanaatsi Wip ichtaru ituyamarangu, wanutseem múchashimash tinarangu, iyaatssha: Xamachi, Ipari kuskachu anush nutseemis múchashimash tinchintspa, tárangiya. Iysha anuri mangoonkiniya. Nduunnaa nutseemani múchashimash pishtaku, ¿mayaama anoo ngutich kutachich? ²⁵ Itaru, wand iyaam pishtakiya. Ashirucha, Isus iyaa yamachu anoom kis kutakaniya; nda sambaytakani.

²⁶ Ashirucha, Apanll Wani iyaa istakiya nda sambaytamaama. Yaani pinasakaniya. Mishat, Apanllpat tsiyatamaam chiyaa istakiya. Tamantsakuni, ¿Amcheezinee? atuni, Apanll Wani iyaa istakiya. Watam waana Apanllpat minamari mangooz chinakanawa; ashirucha tsiyata-

maam kapung yasakiya. Apanllpat iyaam kizpur tsiyatkiya. Chiy anoo chinamaam pinasakchi. ²⁷ Itaru, iy mazinamaam pinasakitaatani, Apanllsha anoo mazinakiya. Apanllpat tsiyatku, Apanll Wani iyaam itsinsaru mashkiya, watam mangeetsini yasakuwa. Apanll zandku anootsim Apanll Wani iyaam mashkiya. ²⁸ Ndamba yasariniya, yuwaa Apanll waana zandkachu anoo xapoomaam wanindaja. Iyaa waama tiptsir kizpur ipusarangu, iyaa izuuru istakiya. Ashirucha, Isusoo mangoonkuni, Waanaatsi Wan iyash pshtayaru, uwsha iyaa wanasireem izuuru ínachiyaa. ²⁹ Mishat, watam iyaa Apanll wasina yasayaru, iyaa: Ipari Isus tamaka wanasir taaku, ashiritam izuuru wanasir taachinllinpa átu, iyaa ipusirangiya. Ashiri ipuseeru, Isusoom zoonll kinarangini. Iyaa zoonllta, itaru Isus iyaatsim wamari kasiriya. Watam uw Apanlliwa. ³⁰ Sirútamasari iyaa Apanll ipuseeru, Iparimuni Isusumam mangis tatungtsa, táyaru, iysha ayu, tárangiya. Yashingoo tatutseeru, iyaa wipaam ínarangu. Ashirucha, Isus wamin iyaa mangeetsini yararangiya. Sheeru, iyaa: Tputsireetsi ungirtachima; iparpati Isuspat kurakaam ínachima, tárangiya Apanlli.

³¹ ¿Tamaru Apanll iyaa istaka? Kizpuri istakiya. ¿Chak Apanllpat tatsamooch? Mayaa, Apanll iyaa chinaku, istaku, ¿chakaja iyaa kasiku kasich?

³² ¿Tamareeja Apanll Wipaa Isusoo tsipun nda pachindarangu, iyaam kiyung kachiyeeru tsiparangu, iyaam taarashemani pachindach? Isusoo chinarangu ashiritam iyaa chinarangu, iyaam taarashshee pachindamaam wanindaja.

³³ Apanll iyaa ipusarangu, wipaam ínarayaru, ¿chak Apanll: Tputsirish yutaritssincha, tách? Atitaatssin, ¿tamaree Apanll anoo mazinach? Watam waana mangeetsini yararanguwa. ³⁴ ¿Chakaja iyaa waneeku wánich? ¿Antaati Isus iyaa wánich? Watam Isus iyamand yutaritshishirini tsiparanguwa.^b Tsiparangitaa,

^b 8.33-34 Isáysa 50.8-9 tsiyatsis nipta tatsamooru taaritama.

itaru yusur támarangiya. Támeeru Apanll kurakaam kizpuri ínayaru, Apanllpatari-sha tatsamooru taakiya. Anush Waparpat iyaam tsiyatkiya. Ashiri iyaam wani-maam nduncha tina. ³⁵ ¿Chakaja Isusoo iya tuwanlltach? Isus urutari iya chinakiya. Kiyung kachiykitaatich, mangich mantsakitaatich, tputs chiya tamundakita, ¿Apanll nuwaa chinakeeja, tácheezich? Nduni. Marizpata taakuch, zapeertaatich taakuch, tputs chiya pachamaam zandkita, ¿Apanll nuwaa chinakeeja, tácheezich? Nduni. Isus chiya urutari chinakiya; nda ayamtaati kasachiya. ³⁶ Apanllpane mang' sirútamasa Apanll p'tseeyaru, uwsha Apanllpat tsiyatarangungu, zurku, tárangiya.

Shiyamand kaminish iya pachamaam zandkana, Apaa; ichinguru zari zandkana, tárangiya. Opeejaatspani ashiru iya pachamaam tputs zandkana;

tárangiya. Yuwaa, tárangu anoo zurku atiya. Ashiri iya Apanllmand kuk pachamaam zandkitaatssin, ashiritaa Apanll iya nda ayamtaati kasachiya; urutamari chinachiya.

³⁷ Ashiri anuri mangoonangtsa. Chiya kiyung yachaktaatssin, Isussha chiya ksumish chinaku, wizpuririni panakchu, chiyamarit kasikchi. ³⁸⁻³⁹ ¿Tamaree iya Apanll natsach? Apanllpat iy taakuni, ¿mayaja iya tuwanlltach? ¿Nitaati Apanll iya nda chinak? Kizpur iya chinakiya, watam iyaam Wipaa zanganiranguwa. Ayamtaa iya chinamaam pastacheeja. Tsipakchitaatini, nitaati chinash pastacheeja. Kchittaattani taakuni, ¿tamaree pastach? ¿Ashiri mayaateeseeja punichich? watam Apanll iya chinakuwa.

¿Tsiptsetstaa, taarasheetstaa, misha Apanlleetstaa wasundururee, Yashingootstaa muchchuree punicheezich? nduni. ¿Yutaritshish sirú tushiyrangungu anootstaa, zapish tushiykchu anootstaa, kanindshuchheetstaa, tsapushcheetstaa punicheezich? Nduni.

Watam urutamari Apanll iya ksumish chinakuwa. Apanll iya patsisaku,

¿chaka iya tuwanlltach? Ashirucha, Wipamun Ísúkirístumun iya chinaku, ayamta nda kasachiya táshina.

Ashiri yuwaa Apanllimun Wani kizpur taakini anoo kamaneena.

Mishat, yuwaa Apanll Utaáshuchee kizpur chinarangu, waama tiptsiri ínarangu anoo kamanchintspa

9 ¹ Ashiriya, Isuschichis, mazinangtsa nuwaa kuki; mangishi chinakuri, Apanll Wani mangishi, zuraktishcha, táyaru, nuwsha anootstam itsinsaru kamanchintspa, watam Apanllchichinawa. ² Átana nuwaya; yaanpatatangaz Utaáshuchingaz mangi mantsakina kizpuri; zandsimun kiyung kachiykina; watam Isusoo ngatkanawa. ³ ¿Tamashta nda mangoonkana? Isusoo mangoonachinllinpa atina. Ashirucha, Mangoonpana turi, nuwaanaatsi tsipani nda pachindki. Utaáshuchin mangoonkinaan-sin, nuwaatsina Isus waani kapeetchin-da átana. [Itaru, nuwaa kapeetcheeja, watam Apanllchichinawa; pinasakcha. Itaru, ngutariti zuwanlleesi Utaáshuchheetssin ksumish chinakuri tina.]

⁴ Apanllsha Utaáshuchee kizpur chinakcha, watam sirútarit zitaminaa waamat tiptsireem ínaranguwa. Sirú Apanll iyapat Utaáshuchpat taarangu, machip íwarip Apanll kuk kimarangu, waana iyashchish yakarangu, 'sinirineetsi parangusin, napuxtarangana. Anush Apanllsha: Nuwaa kuki payukinaareesa, uru siyaa wanasir istachintspa, tárangiya. Apanll waanaatsi kuk tuyandayaru, iyaamsha Utaáshuchee mani zitaminarini panarangiya. Apanll Utaáshuchee waatsini waanaats kis ungirtamaam tayasparangiya. Ipareetsi siyap zanganchima, tárangitamta. ⁵ Apanll zitaminarineetsini upachir chinarangu, anoo ichinguru kamanirangiya; Istachintspa, tárangiya. Iyaatstam nllurnureetsini chinaktamta. Apanll Wip Isusu Utaáshuchish nllurtarangiitamta. Isus kikiritcha Apanlli; wamari kasiru. Ungirtakuni, Shiy kizpurtishcha, Isusoo, uru táchinipa. Ashirucha,

Apanll Utaáshuchee kizpur chinakiya; táshina.

⁶Itaru, Apanll xapookparee Utaáshuchee, tárintspa, watam Utaáshuch tputs nda ichingurusin Apanllee tachitkana-wa. Nitaati ichingurusin Utaáshuch Apanlleeja tiptsiri, nduni. Itaru, yuwaatsim ichinguru Apanll Utaáshuchee ashchima, tárangu, anoosimari tatsamchiya. ⁷⁻⁸Yuwaatsim Apanll waana ipusku anoosim tputsirtana tiya. Apramarinchich nlluranurini zapanimuntaa, itaru ¿antaati ichingurooja kaapa Apanll tiptsir? Watam Apanllsha Apramarineetsi: Nuw kaapa chinachi an watacha iparish Isaaka, ^atárangiya. Yuwamari Apanll ipusarangu anumari kaapa Apramarinchich tputsi. Yuwaatsim: Watacha shiy nutsish, tárangu, anoosim ipusarangiya. ⁹Apanll Apramarineetsini tárangiya; Yusur arangtachish masach kuschima. Ashparitam zari anush Sar urutarisha wip wandachu kuschima, ^bApramarinee tárangiya. Ashiri yuwash tatsamoochu anush tatsipeeru, Apanll anoosim ipusarangiya Isaakarineetsimta. ¹⁰Anumunsha Isaakarini wachinayaru, kizaa yamayaru, wipaam tsimbun tinarangiya. Wizanll Rebekekarini tsimbun iwipuru, tatsipurangiya. ¹¹Itaru, ndatuma tatsipuru, ndatuma nllurtarsin, Apanll wasina minamari Akoparineetsim ipusarangiya. Ndatuma yutaritshishee yasarsin, Apanll minamtaatsimari ipusarangiya. ¿Nitaati Apanll: Incha wanasiri, in ipuschima, tárangeeja? nduni. Waana Apanll zandku anoosim ipusarangiya. ¹²Apanll Rebekekarinee tárangiya: iparish shipamunach kizpur kurak taachiya. Itaru, iwachiztamarinsha kurakatam zuwanllimand tsipas taachiya, ^ctárangiya. ¹³Yusur minu Apanll tuyandarangiya. Tárangeeja;

Akoparini tputsireemi ipusarangiina. Itaru, zoonllee Esawarineetsi nuw niyrarangiina, ^d

tárangiya Apanlli. Ashiri Apanll Akoparineetsim ipusarangiya. ^e

¹⁴Apanll yutaritparee, ¿mayaama ashirang? ¿tamaree kanxoo ndaturi nllurtaru anoo niyrchich? Nduni, tárintspa. ¹⁵¿Apanll Móysisarineetsi tuyandaku amaranga?

Nuwaana zandkuri, tputsee yuwaa nuwaana chinaki anoo nayanichima, ^ftárangiya. ¹⁶Ashiri Apanll waana tputsee nayanimaam zandku, nayanikiya. ¿Nitaati tputs: Apaa, ipusanda, táyaru, Apanll ipusak? nduni. Mishat, tputs: Wanasir taakuri, kiyung kachiykuri, anumand Apanll nuwaa ipusachparee, átu, ¿nitaati Apanll anumand ipusak? nduni. Waantari Apanll tputsee nayanikchu, anoo ipuschima, atiya. ¹⁷Itaru, Apanll Parawrineetsini nda ashirangiya. Apanll Parawrineetsini:

Nuw shiyaa ipazapi aturi, shiyaa kurakaam ínarangiina. Waani tputs ichingurusin tsapurunas ztaru nuwaa yasapana aturi, ^gnuw shiyaa kapung waneekchuri, wizpurineetsi yasachinllinaya, tárangiya Apanlli.

¹⁸Ashirucha, Apanll tputsee ipuseeru, nayaniku istakiya; tina.

¹⁹Itaru, tputs ashpatam átpasinaya; Watam Apanll waana zandku, nda ipuskuwa. Ashiri nuwaa kasarangu, nda ipusarangu, ¿mayaamshta nuwaa wanichinda? ¿Ashiri yuwaa Apanll nda zandku anoo chiy tamaycheezich? átpasinaya tputsi. ²⁰Itaru, siyaa anoo tárintspa. ¿Tamaree tputsich Apanllee yámchich? Nitaati chiy Apanllpa wari-

^a 9.7-8 Nishuri yuwartatam Apanll chtarangu 21.12 átu atitamta. ^b 9.9 Nishuri yuwartatam Apanll chtarangu 18.14 átu atitamta. ^c 9.12 Nishuri yuwartatam Apanll chtarangu 25.23 átu atitamta. ^d 9.13 Nishuri yuwartatam Malakiyasa 1.2-3 átu atitamta.

^e 9.10-13 Apanll chtarangu 25.23; Kurak Tsipasa 6.15 tsiyatsis nipta tatsamooru taaritamta.

^f 9.15 Nishuri yuwartatam Tashitungarangu 33.19 átu atitamta. ^g 9.17 Nishuri yuwartatam Tashitungarangu 9.16 átu atitamta.

tareezich. Napa kiz muritsaa kayateeru, nitaati murits: ¿Mayaamsha shiy nuwaa muritsaam kayataksha? teeja nda.^h

²¹ Watam kiz yuwaa waana zandku anoo kayatariya. Wanasirimash kayatamaam zandku, kayatkiya. Yuttamaa mangu-tari payumaam zandku, yuttamaama kayatkitamta.ⁱ ²² Apanll ashkitamcha chiyaatsi. Wapaz waana tsiyantayaru, wizpuririni tuyamandamaam zandkachu, waneekchu, ¿chiy anoo tamaree watsta; shirinllpa táchich?

Itaru, Apanllsha uru nayaniku, nda musá wanitariya. Apanll wanipa tpu-tseem kutarangu, nda musá waneerangu, ashiritaa nda mangoonkana. Tputsee wanimaam waritaktaa, Apanll nayaniku, kutakiya. ²³ Itaru, iyaatssha wasina ipusarangu, nda waneerangiya. Nayanisheem ipusarangiya. Iyaa kizpur chinarangu, nayanirangu, wipaam ínarangiya. Ashirucha, urutamari Apanllush wanasirimshirini kiswa taachiniya; atiniya. ²⁴ Apanll iyaa Utaáshucheetsini ashpatam ipusarangiya. Siyaatstam tunareetsis ashpatam ipusarangiya. Waana zandarangu ashirangiya. ²⁵ Watam apanllpan zitamin anootstam wasina kamaniranguwa. Tunareemtamtis Apanll Oseyasarineetsi tuyandakchu, tárangiya;

Piyartacheetstaa tputs: Siyaa tputsirtana, táchina. Yuwaa nda chinarangi anootstaata: Siyaa ksumish chinaki, táchina. ²⁶ Yuwari tputsee siyaa tputsireezi, tárangi anootstaa, natshacha tputsirtana táchina. Ashiri tputs: Apanll urutamari taataru anu arapchee tputs wipaam ínarangiya; tputs ztaru táchinlliniya; tárangiya Apanlli. Ashirucha, tárangu anurisha arapcheetsis tputsis ashpatam ipusarangiya táshina. ²⁷ Itaru, iyaatssha Utaáshucheetsini Isáysarini wasina kamanirangtamta;

Utaáshuchin zapantaatssin, mazach tamaparee ashirusin, Apanll waneek-

chu, machinshapa kamungchinlliniya, tárangiya. ²⁸ Apanll k'kuz tsimbun payutareeja nduni. Tputsee ichinguru wanichima, tárangu, ¿tamaree nda wánich? Mangu tácheeja;

Isáysarini kamanku, tárangu.

²⁹ Ashirucha, sirú Isáysarini wasina natstarangu;

Ndunnaari Apanll Taarashipan siyaa istarangu,

Sodoma, Gomorshucheetsitam tamarangpari

ashiranganapsinaya

siyaa izuuru kachingaranganaya.^j

Itaru, iyaa nayanirangu, naparangiya;

tárangiya Isáysarini. Ashirucha, Apanll iyaa Utaáshucheetsini nayanirangu; machinuw katuchichparee atina.

Ashiri yuwaa Apanll Utaáshuchee machinuw waama tiptsir ipusarangu anoo kamaneena.

Mishat, yuwaa Utaáshuch waanitari nda Apanllimung mang' taturangusin, Apanlleem xapoorangana anoo kamanchintspa

³⁰ Ashiriya, ¿Apanll tamarangeeja?

Piyartacheewa tputs kis naparangiya.

Nduntaa Apanlle kamachtamarini sirú payurangusin, nat'sha Isusumang mang' tatkusin, Apanll kishha napkiya. ³¹ Itaru, Utaáshuchsha kapung xapoorangana.

Apanlle kuk payuyani táyaritaatssin, pinasarangusin, xapoorangana. ³² Yuwamand Apanllimung kamachtamarini mang' taturangana anumand kaapa

Apanllimung mang' nda taturangusin, xapoorangana. Waantin pinasarangana; Isusoo kapung ngatarangana. ¿Tamaree

Isusumand watsipun iyaa Apanll kis napach? atusin, kapung ngatarangana; tsiyantarangana. Chiy patumbchee

paktaatich, tuteeruch pantsatarich, Utaáshuch ashikpaz ashirangtamana

Isusoo mangoonamaama. ³³ Apanll kuk

^h 9.20 Daniela 4.35 tsiyatsis nipta tatsamooru taaritamta. ⁱ 9.20-21 Jeremiyasa 18.4-6 tsiyatsis nipta tatsamooru taaritamta. ^j 9.29 Nishuri yuwartatam Isáysa 1.9 átu atitamta.

anootstam kamanirangiya. Ipari patumbich tamapari ashicha, tárangiya;

Utaásh watsapun patumbichpaz ngootsish wayaranguri ashiruri, anumun xararangana tina. Tuteepaz ashirangana. Itaru, yuw tputs Iparimun mang' tatkana anoo tpazacheezi nduni; tapachindachima,

tárangiya Apanlli. Ashiri yuwari Apanll, tárangu anuri Utaáshuch ashkanaya.

10¹ Zuwanllée, mazinangandama. Zuwanllingazeewi Utaáshuchingaz kizpur chinakina; zuwanlléemawí uru Apanllpat tsiyatkina; Apara, shiyaa Iparish mangoonchinllinpa, tát ashkina. ² Utaáshuch kaap Apanllingaz zandkitaatssin, itaru nda itsinsaru mangoonkana; masatakpaz ashkana. Nda kaapa mang'pa mangoonkana.

³ Waanaatstin yaramaam zandarang'sin, Isusoo ngatarangana. Yaantari Apanllée kamachtamarini ichinguru payuyaruni, mangeetsini yarachpariniya, tárangana. Apanll: Shaanaatsi yaramaam pinasakish; itaru, Iparimandi yarachintspa, tárangitaa, ngatarangana.

⁴ Apanll waana: Tputs Ipareetsi mangoonpana átu Móýsisarinee wasina tuyandarangiya. Ashiri Móýsisarini kuk Apanllée Wip wasina kamanirangtaa, Isus tputseem kinarangu, Utaáshuch nda natstarangusin, ngatarangana. Itaru, tputs Isusumun mang' tatkinaareesinaya, Apanllsha yutaritshishee tachingchiya. ⁵ ¿Waana Móýsisarin amka Apanllée kamachtamarini payumaama? Ateeja; Tputs Apanllée kamachtamarini payukinaariya, anumun taachiya. ⁶ Itaru, Apanllée Wip mangooneeruch, Apanll chiyaa kis napakcha. Ashirucha, Isusoo mangooneeruch, kamiran kamungachchi, tina. Siysa, Tamangani; ¿chakaja iyamand kamini amb íwar káreeru, tsiyatsis amb yáyarú, iyaamsha panach' átpasa. ¿Mayaama táchich? Watam Isus Waparish káyashinu nish tsapush kusaranguwa. ⁷ Mishat, siysa; ¿Chakaja

iyamand kamini wantsush pshtuch' átpasa. Nduni. Watam Isus tsiparangu tsapush mapurangsín, támaranguwa.

⁸ Ashiriya, Apanlleem xapooktana tárinllpa. Móýsisarini anoo atitamta; Apanll kamachtamarini siyash watsiritari taariya. Saanshutari kukis, mangishitamtsi taariya. Ashirucha, nuw siyaa atashina, An tsiyatsis siyamand nda arap taariya Apanllée kamachtamarini tuminumaama,^a tárangiya Móýsisarini. Móýsisarini átu, Isusoo kuk atiya. Nuw: Isusoo mangoonamaam kamiranacha atitamana.

⁹ Chiy waanari: Isusoo nuw Kurakar-tana. Isus tsiparangitaa, itaru Apanllshacha nuwaam yutaritshishiri tapachindamaam ituyamarangasha, zurumapatich chiy atinaareechi ashiru, chiy na kamungamtichcha. ¹⁰ Ashiri mangishich mangoonkuch, k'kiptich tputsee kama-neeruch, Apanllsha chiyaa kis napchiya; chiyaa tapachindachiya. ¹¹ Watam Apanll: Yuwaa tputs iparimuni mang' tatku, tpazacheezi nduni, atuwa.

¹² Ichinguroots tputs Apanll ashchiya. Tputs Apanlleets: Apara, istangandama; tpachindangandama átu, ayu táchiya. Ichinguru istakiya; kpachindaja. Utaáshuchestam istaku, arapcheestam tputs istaku ashkiya, watam wamari kasiruwá; minamtaataya. ¹³ Ashiri, ichinguru tputs yuw Apanllée Wip: Isusoo, istanda; shiyash kamungpi átu, Apanllsha tatutschiya; taarashshee urutamash panachiya. Ashiri Isusoo kamungamaam taariya.

¹⁴⁻¹⁵ Itaru, Utaáshucheem xarashish minamari taariya yuwamand Isusoo kuk nda mazinakana anumanda. Mazinang-tsa; ndunnaa kamanimaam kamachtaru, ¿chakaja kamanich? Tputs ndunnaa Isusoo kuk kamanku, ¿tamareeja mazinachich? Chiy ndunnaa mazinakuch, ¿tamareeja Isusumun mangich tatchich? Chiy ndunnaa mangich tatku, ¿tamareeja istanda táchich? Itaru, Apanll tputsee kamanimaam zanganiranguwa. Apanll kuk anoo wasina kamanirangiya;

^a 10.6-8 Nishuri yuwartatam Tayusima 30.12-14 átu atitamta.

Tputs tsiyatssee wanasirimshee
 machip wayakchusin,
 machshuchsha tputs anoo
 mazinakchusin,
 mang' kis shambatchinllinaya.
 Watam, Apanll siyaa
 tapachindaranguwa;^b

sirútari tárangiya Apanlli. Ashiri yuwa-
 ri, tárangu anuritam na iy kamanimapa-
 nini taakanaya. Isusoo kuk mazarangu-
 ni, ashpatamani mangoonarangtanicha.
¹⁶Itaru, Utaáshuch ashpatam tputs nda
 mangoonarangana; anoo Isáysarini Apa-
 nlllee kamanirangiya.

Apa, k'keetsish kamankuri,
 tputssha anoo k'kuz mangoona-
 maam nda zandkanaya;^c
 tárangiya. Natsha ashkitamsincha Utaá-
 shuch tputs; wandaritam zapan ngat-
 kanaya; machinaw mangoonkanaya.
¹⁷Ashirucha, tputs Isusoo kuk kamanku-
 sin, chiy mazinayaruch, mangoonakchi
 tina.

¹⁸Itaru, ¿Utaáshuch tamaranganaya?
 Mazinarangitaatssin, nda mangoonara-
 ngana. Ashirucha, tsiyatssee Utaáshu-
 chee shuneersin kamanirangana; watam
 Apanll kuk atuwa.

Tsup nduntaati tsiyatku, zartam ndun-
 taati tsiyatku,

tputssha nduntaa kukoo mazinak-
 sin, ashtaa,
 tsapurunasush ichinguru-
 sin tputs Apanlllee kuk
 mazarangitamsinaya,^d

Apanll tárangiya. ¹⁹Ashiri mazinamana
 mazarangitaatssin, Utaáshuch mangoo-
 narangazinllinaja. Móysisarini ichtaru
 yuwaa Utaáshuch ngatchinllina anoo
 wasina kamanirangiya. Móysisarini,
 tárangeeja;

Apanll ateeja; Nuw nllitaritaats-
 sha tputs yuw nda nuwaa yasarana
 anootssha nuwama tputsireemi ipus-

chima. Amb ashkachuri, siyaa nuwaa
 pachindkus, anumand tsiyantachpa-
 sa,^e átcha Apanlli,
 Móysisarini tárangiya. Ashiri yuwari,
 tárangu anuritam na Utaáshuch tumi-
 narangana. ²⁰Mishat, Móysisarininimun
 ush zapishsha Isáysarini putitiri tsiyatku
 Utaáshuchee waneerangiya.

Apanll ateeja:

Tputs nuwangaz nduntaa
 nachungarungusin,
 natsha nuwaa parangusin, nuwash
 kusarangana.

Tputs nduntaa nuwaa, Apaa, tapa-
 chindanda, tárangusin,
 itaru natsha nuwsha, ¿Maya? Natu
 tsiyatangandama, atina,^f átcha
 Apanlli,

Isáysarini tárangiya. ²¹Itaru, Utaáshu-
 cheetssha waneeku, tárangiya;

Apanll ateeja;

Ichingaru zar nuw Israelchichee
 kuruzarangi,

Nuw siyaa istapi, atina, táranguri,
 kuwi nguti paxa ashirangina.

Ashkitaati, siyaa nuwaa
 niyrangus,

zurampatari nuwaa ngatarangsa,^g
 tárangiya Apanlli,

Isáysarini tárangiya. Ashiri Utaáshuch
 yuwari sirú ngatarangana anuritam
 wand tuminkanaya.

Ashiri yuwaa Utaáshuch Isusoo ngata-
 rangana anoo kamaneena.

Minootssha tsiyatssis kamanchintspa;
yuwaa Utaáshuch natuma machin
mangoonkana anootsi

11 ¹Ashiriyaa, Utaáshuch Apanlllee
 kuk ngatarangsin, Apanllsha
 natumasam waanaatsi tiptsiri niyrakpaz
 ashikcha. Apanll izuurupa Utaáshuchee
 kasarangiya tárintspa. Watam nuw Utaá-
 shuchtamti mangoonkinawa. Kizpurtana

^b 10.14-15 Nishuri yuwartatam Isáysa 52.7 átu atitamta. ^c 10.16 Nishuri yuwartatam Isáysa 53.1 átu atitamta. ^d 10.18 Nishuri yuwartatam Salmo 19.3 átu atitamta. ^e 10.19 Nishuri yuwartatam Tayusima 32.21 átu atitamta. ^f 10.20 Nishuri yuwartatam Isáysa 65.1 átu atitamta. ^g 10.21 Nishuri yuwartatam Isáysa 65.2 átu atitamta.

Utaáshuchina nuwaya. Nuw Benjamin-chichtana; Apramarinchichi zitaminarinchichi nuw wachinllini. ² ¿Tamaree Apanll waana tiptsireem ínarangu anoo izuuru kapeetach? Ashcheeja, watam wandari iyaa Utaáshucheetsini chinakuwa. Elíyasarineetsi kuk yandama mazinarangpasa. Anush yuwaa machin tputs Apanllee mangoonkana anoo kamankiya. Elíyasarini, tárangiya;

³ Apara, iyashchi yuwaa shiyaam ungirtamaam wayarangana anoo kapeetarangsin, shiyaatstam tputsirish zapan pacharanganaya. Na nuwamarisha suwarangina. Itaru, na wandaritam nuwangaz pachamaam nachungakanaya;^a Elíyasarini tárangu, ⁴ Apanllsha: Tárinllpa. ¿Nitaati shiyamaritaja mangoonkish? Nuw tputsiri wand katuchim taachinllinaya. Tputs 7,000 Israelchich wandari taaranaya, yuw nda Baalaa ungirtarangana anu,^b mang Apanlli Elíyasarinee tárangiya. ⁵ Sirútama Elíyasarinpur machinaw mangoonarangana.^c Na wand ashkitamsina iy Utaáshuchini. Zapaneezini mangoonkini. Itaru, Apanll iyaa Utaáshuchee wand chinakiya. Apanll waana zandarangu, iyaatsim nayanirangu, waamatamari tiptsireem ipusarangiya. ⁶ Nitaati yuwamun chiy wanasiri taakich anumun Apanll chiyaa ipusak, nduni. Anumun iyaa nayanimaam pinasakiya. Itaru, waana zandeeru, iyaa chinaku, iyaa nayaniru ipusarangiya.

⁷ Itaru, mazinangtsa; Utaáshuch ashpatamsin yachapani, Apanllee kuk izuuru payukchuni, kamapa Apanll iyaa kis chinachiya, tárangitaatssin, xapoorangana. Watam nda anumand Apanll tputsee ipustaruwa. Itaru, Apanll waana zandarangu, Utaáshuchee ashpatam ipusarangiya. Isusoo mangoonarangsin, anootsitisin Apanll kis napkiya. Itaru,

min tputs aranginasha ngatamapaneem kinarangana. ⁸ Apanll kuk anootstam kamanirangiya. Ngatkana anoo Apanll tamangshartarangiya.

Nuwaa ngat ngat ashkusin, waani wach pchuspaz ashirusin taachinllinpa. Nuwaa kuki nda mazinamaam zandarangsin, waani wits mitssharitpaz ashiru taachinllinpa; tárangu Apanlli. ⁹⁻¹⁰ Dapiyarin anootstam ngatamapani kamanku, Apanllpat tsiyatku, tárangiya;

Ashiri, Apara, uwsha shiyaam katungamaam shaniykusin, shiysha waneengcha.

Wach mchus tamapari ashiru mangu masaru taachinllinpa.

Uru kiyung kachiychinllpa.

Tputs kiyakpaz chiparu ashiru, ixap ixap ashchinllinpa,^d

tárangiya Dapiyarini. Dapiyarini zurku, tárangiya, watam iy Utaáshuchini kapung ngataranguni, Apanll iyaa waneekuwa.

¹¹ Itaru, mazinangtsa; Utaáshuch Apanllee Wip ngatarangsin, nitaati Apanll Utaáshuchee anumand watstamamari kapeetarang, nda. Apanll Utaáshuchee yusur kis napchiya. Itaru, natumasam Utaáshuch Apanllee ngatarang'sin, Apanllsha nllitarita tputs arapchee tapa-chindakiya. Zapshina Utaáshuchsha: ¿Tamaree nda iy ashkini? táyarusin, uwshtisin Apanllee Wip mangoonchinlliniya. ¹² Utaáshuch mangooneersin, Apanllsha kis chinayaru, ichingurootsshapa tputsee kizpurinasha Apanll istachiya. Natama Utaáshuch Apanllee mangoonamaam xapoorangusin, Apanll izataru piyartachee tputs kizpur istakiya. Ashiri Utaáshuchshtisin yusur ktatayarusin, mangooneersin, Apanllsha aranginasha tsapurunasshuchee ichinguru ztaru istachiya.

^a 11.3 Nishuri yuwartatam 1 Utaáchich kuraka 19.10, 14 átu atitamta.

^b 11.4 Nishuri yuwartatam 1 Utaáchich kuraka 19.18 átu atitamta.

^c 11.5 1 Utaáchich kuraka 19.18 tsiyatsis nipta tatsamooru taaritamta.

^d 11.9-10 Nishuri yuwartatam Salmo 69.21 átu atitamta.

Ashiri yuwaa Utaáshuch natuma pakchim mangoonkana anoo kamaneena.

Mishat, yuwaa Apanll Utaáshuchee natumasamaam niyrakpaz sheeru, putsee nllitaritaa siyaatstam Apanll istarangu anoo kamanchintspa

¹³Na siyaa arapcheetsis táchintspa; Apanll nuwaa kamachtarangu; Arapchee tputs Isusoo kuku kamanishini; tárangu, anuri chinakina; kissha tayas-patakina. ¹⁴Ashkachuri, Utaáshuchshaparee mangoonchinllinaya tina. Siyaa pakeersin, ¿tamarima arapchitaa tputs Apanlee mangoonkanaya? atusin, Apanllingaz támarachpasinaya. Iysha sheentamani táchpasinaya. ¹⁵Watam Apanll Utaáshuchheetssin kapeetarangtaa, yusur mangoonkatssin, ¿tsiparangepaz támeeru ashchinllinawa? Apanll Utaáshuchheetssin kapeeteeru, arapich tputs mangoonarangana, ashiri Utaáshuchsha mangoonkatssin, aranginasha Apanll tsapurunasshuchee tatsuyayaru, ichinguru ztaru istachiya. ¹⁶Utaáshuch Apramarinchichcha. Apramarin yasinnaari ashiru, xixpurpaz ashicha; iy Apramarinchicheeruni tputsini pizpaz ashitanicha tina. Xixpur wanasiriya ashiru, piz ichinguru wanasirtaru ashkitamanicha. Iy ashitanicha. Ashirucha, iy Apramarinchicheeruni, Apanllsha iyaatstam kis chinakiya. ¹⁷Natumaricha niyrkasha Apanlliya. Itaru, siyaa arapcheestaatis kis chinakiya. Utaáshuch tamapari ashiru taaksa. Apanlleem tiptsiri kinarangus, kizpurtayarus, kis taaksa. Utaáshuchheetssin tamapari ashiritam Apanll siyaa kapung istakiya. ¹⁸Ashiri: Iy Utaáshuchee kasiyanicha, tárintspa siya, watam Utaáshuchimand siyaa Apanll istaranguwa. Isus Utaáshuchee kinarangiya; Apanlleeru siyaam taarashish panarangiya. Ashirucha, atashina. ¹⁹Itaru, mangishis wandari: Apanll iyaa arapcheetsini kis chinapi átu, Utaáshuchee kapeetarangiya; Utaáshuch yutaritpasinaya, átpasa. Iynaa wanasirtanicha, átpasa. Tárintspa,

Isuschichis. ²⁰Atinaaris, nuwsha siyaa: Utaáshuchee zuramana zuraktishcha. Itaru, nitaati yuwamand siy wanasiri taarangis anumand Apanll Utaáshuchee kapeetarang, nda. Yuwamand Isusoo ngatarangana anumand Apanll Utaáshuchheetssin kapeetarangiya, tina. Itaru, siy Isusoo mangoonarangus, Apanllsha siyaa kis naparangiya. Ashirucha, paptsa tina. Saanaatsi ungirtarintspa. Utaáshuchee yutarit tsiyatintspa; mangiptis mangooneerus, punirustangtsa yuwamand Apanll siyaa chinaku anumanda. ²¹Ndunnaa wanasir mangoonkus, Apanll siyaatssha kapeetchiya. Utaáshuchee tiptsireetstaa waneerangu, ¿siyaatsinashtaja nda waneeku wánich? Siyaatsinaa misisinashaparee. Ashirucha, paptsa tina.

²²¿Tamaru Apanll tputsee nayanika? Itaru, nayaniktaa, wanitaritamcha. Napa: iyashuch ngatarangana anoo izuuru waneerangiya, itaru siy mangoonarangus siyaa nayanirangiya. Ashiri zurumarpatís mangoonkus, nda kasakus, Apanll siyaa nayaniku, nda wanichiya. Itaru, kasakinaareesa paptsa; Apanll siyaatssha waneeyantspa tina. ²³Utaáshuchee ashtachtamparee. Utaáshuch Apanlee yusur mangoonkinaareesinaya, Apanllsha yusurshaparee kis napchiya. ¿Tamareeja nda ashich? watam Apanll nda xapookuwa. ²⁴Siy sirú nduntaa Apanlee chinarangus, natunaa Apanll siyaa tiptsireem inarangiya. Utaáshuchee sirú ipusarangu, ashiri na misisinashaparee tiptsireem ínachiya.

Ashiriya, yuwaa Apanll Utaáshuchee natumasamaam niyrakpaz sheeru, siyaatssha arapcheetsis istarangu anoo kamaneena.

Minootssha siyaa kamanchintspa; yuwaa zapshina Utaáshuchtsin yusur Apanlee mangoonachinllina anootsi

²⁵Ashiri siyaa Isuschicheetsis mangedeetsis p'tsichintspa. Arapcheewis nda saanaats ungirtamaam aturi, tsiyatssis

kaneesich kamanchintspa yuwaa nda sirú mazarangis anootsi.

Utaáshuch Isusoo ngatkitaatssin, natumari ashkana; zapshina watsiyunoo kapeeteersin, mangoonachshapsinaya. Arapich tputs Apanlee tatsamooru mangoonaramchusin, Apanll: Wapparee, waritayanllcha táyaru, anamunsha Utaáshuchshytisin mangoonachpasinaya. ²⁶ Ashiri Utaáshuch tputs Apanllingaz zandeersin, yusur mangoonachpasinaya; tiptsireem yusur ínachiya. Apanll waana, tárangitamta;

Siyash Utaásh tapachindampani nllurtachiya; nuwtanda ipari. Ipareetsi chinakinaareesa, yutaritshishireetsis tachingeeruri, kamungatssa, Utaáshuchee Apanlli, tárangiya.

²⁷ Yutaritshishireetsis kapeeteeruri, nuwamasha tputsiri urutamari taatssa; Utaáshuchee mang, tárangiya Apanlli. Ashiri zurkuri atina; Utaáshuch zapishpa ichingurusin mangoonchinllina táshina.

²⁸ Itaru, natumasam Utaáshuch Apanlee kundartakpaz ashkana, watam Isusoo ngataranganawa. Ashiri ngateersin, siyaa Apanll arapcheetsis istarangiya. Itaru, Apanll na wand Utaáshuchee chinakiya, watam sirú tiptsireem ínaranguwa; zitaminarineetsi siyaa tputsireemi ipusarangina, táranguwa. ²⁹ Apanll chiyaa nayaniyaru, ipareemi ínachintspa, tárangu, ¿nitaati ayamta yusur watsta tácheeja? nduni. Yuwari tsiyatarangu anuri payutariya.

³⁰ Napa: siy sirú Apanlee nda mangoonarangus, itaru yuwamand Utaáshuch ngatkana anumand Apanllsha siyaa nayanirangiya. ³¹ Ashiritam, Utaáshuch Apanlee natumasa nda mangoonkana; itaru yuwamand siyaa nayanirangu anumand Apanllsha Utaáshuchee yusur nayanichiya. ³² Apanll uru ashtaracha; nayanimpancha. Tputs ichinguru ztaru natumasam Apanlee nduntaa mangoonkusin, ashiritaa tputsee izataruri nayaniyaruri, chinachima; tárangiya Apanlli.

³³ ¿Apanll tamara? ¿Wanipa mangush chinaranga? ¿Mang' kapungtee? ¿Tamampata tputs mang' tatsamooch? ¿Apanlee tamaree mang' natstachich? ¿Tamaree Apanll ichinguru ashtaru anoo mangoonchich? ³⁴ ¿Chakaja Apanlee, Mangish pishtakcha; piy shingcha, tách? ^{e 35} ¿Chaka: Apaa, istanda, watam shiyaa istaranginawa, tách? Nduni, ¿tamaree tputsich táchich? ³⁶ Itaru, Apanll waana chinayaru, iyaa tapachindarangiya. Apanll waana tapachindaapi átu, iyaam Wipaa zanganirangiya. Apanll waana iyaam tapachindamaam izuuru tatsamchiya. Ashiri urutamari Apanlee ungirtayani. Apaa, shiy kizpur-tishcha; tapachindarangish anumand Wapparee, Apaa; táyani, tina. Ashiri yuwaa Utaáshuch zapish mangoonchinllina anoo kamaneena.

Mishat, wanasiri taamaam siyaa Isuschicheetsis wanichintspa

12 ¹ Ashiriya, zuwanlee, Apanlee ngatintspa; zurampatari tchitangtsa; tsipatsetstam punirintspa. Nuw siyaa waneekina, ¿watam siyaa nayaniru tatutsiranguwa? Apanlleetsimari chinakus, wanasiri taangtsa. Apanll uru nuwaa kis chinapanda átus wanasir taangtsa. ² Yashingchich tamakpasinaya ashirus taarintspa. Mantsir taamaam yaspateeyantspa. Itaru, watam Apanll na mangeetsis yanischianlluwa, mangishis itsinsarus chinangtsa. Watam Apanll zandku anootsimari mangoonatsawa. Antaati Apanll zandku an yutaritaja, watam Apanll iyaam wanasirimsheetsimari istamaam zandkuwa. Ashiri zurampatari tchitangtsa; siyaa táshina.

³ Mazinantasa; misha táchintspa, watam Apanll nuwaa kamachtaranguwa. Apanll waanaatsi wizpuririni siyaam panarangu anoo mangeetsis p'tsichintspa. Apanll siyaam ichinguroomis panarangitaa, itaru nda

^e 11.34 Nishuri yuwartatam Isáyasa 40.13 átu atitamta.

waanandari kamachtarangiya. Ashiri saanaatsi ungirtarintspa; arangeem: Nuwamaritcha Apanlee wizpuririni kapung payuki tarintspa. Watam Apanll waana zandku, siyaam tatsamooru wizpuririnee panakuwa. ⁴Apanll siyaam wizpureemis panarangu, tputseemsha nllitarita wizpuririni panarangitamcha. Tatsamooru panapantar ashkiya. Itaru, kamachtamarini nda waananda, watam nllitaritam nllitaritam ashiruwa. ⁵Isusoom iy ashkitamanicha. Zapantaatani Isusoo mangoonkuni, minamaritpaz ashiruni taakani Isusooma. Yaanpataatani istakaniya Apanlleem chinamaama. ⁶Apanllchichis zapantaatis, Apanll ichinguroom wizpureemis panakiya. Itaru, nda waanandari kamachtaku. Tputseets nllitaritamash kamachtaku, minoots tputs nllitaritamash kamachtaku, ashishitar ashkiya. Yuwaamam Apanll waana ipusarangu anoom wizpuririneetsi panatariya. Apanll waanaatsi kuk shiyaa kamanimapanem inakinaari, ashiri Apanlleetsim kuk itsinsarush kamaningcha. ⁷Apanll istamapanem shiyaam inakinaari, kis istangcha. Apanll tayaspatampanem shiyaa inakinaari, kis tayaspatangcha. ⁸Apanll shiyaam yaramapanem inakinaariya, tputseem yaramaam tangcha. Wanasiri taamaam waneengcha. Apanll kurikireemish zapanaari panaku, shiyaa: tputseem istangcha; tinaariya, yuw pishtaku anoom kis istangcha. Apanll shiyaa kurakaam inakinaari, tputsireetsish wanasiri napkush tangcha. Mangiptish tangcha. Wanasiri tputsireetsish yapatangcha. Apanll shiyaa tputsee nayanimpanem inakinaari ashiru, ashiri shiy tputsee nayanimpaniri tangcha. Yuwaa tputs kiyung kachiykana anoo kis istangcha. Ashiri Apanllpat wizpuririni shingtsa nuw siyaa tashina.

⁹Minootssha na wanichintspa. Siyaa ichingurootsis tina; ngutaritis k'kiptis

chinarintspa. Chinamarisha chinangtsa. Tputsee yutaritam inarintspa; ngichintspa. Wanasirimshi chinakus, taangtsa; ksarintspa. Yutaritshishee pakchiyam mangoonintspa. ¹⁰Maachiritaatsis chinakis ashiritam Apanllchichpatatis chinangtsa. Aranginasha chinangtsa. Apanllchichpatatis wanasir tsiyatangtsa; saanpatatis wanasireem inangtsa, watam Apanllchichpatatssawa. ¹¹Apanlleem wamin sambaytarintspa. Apanllimun Wani shambatkus, Apanlleemari taangtsa. ¹²Isusoom kusamaam kutakus, shambatamarinpatis k'tangtsa. Kiyung kachiykitaatis sambaytarintspa; Apanll istachapantsa. Apanllpat tsiyatamaam ksarintspa. ¹³Apanllchicheem maachi pishtakinaari, ngutaritis istangtsa; maachi panangtsa. Apanllchich nllitarita siyash napkatu, wanasiri pangishis yapshtungtsa; maritamaam niyrintspa; pangeetsis pchindintspa. ¹⁴Tputs siyaa kiyung yachakinaariya, yutarit tsiyatintspa; chinampat tsiyatangtsa. Apanlleem: Apaa, wanasiri napangcha; istangcha tangtsa. ¹⁵Tputs mang' ksakinaari, siyaa mangis ksangtamtsa. Tputs tanukinaariya, tistayarus tanungtamtsa. ¹⁶Ichingurus wanasir mapiyrus taangtsa. Tputsee niyrintspa; chinangtsa. Tputs nda waritaru anpata ipunkus, chinangtsa. Saanaatstam ungirtamaam tsiyatintspa. ¹⁷Tputs siyaa kiyung yachaktaa, yutaritam inaktaa, siyaa tistarintspa. Mangis wanasiri chinakus, taangtsa. Wanasirinaari taakus, siyaa tputs ;tamaru taaka; tachpasinaya. ¹⁸Nambaptangat shirintspa. Tputspata yapatarus uru chinakus, taangtsa. ¹⁹Isuschichis tsiyantarus ksatarintspa, watam Apanll: Nuw siyamand tistakachuri, kundarareetsis wanichima;^a Apanll atiya. ²⁰Itaru, siyaa kundarareetsis istangtsa; chinangtsa. Mariztakinaariya, maritangtsa. Sachitkinaariya, yasingtsa; ashkinaareesa ashiru kundararis kapungunasha pazichinllinaya.

^a 12.19 Nishuri yuwartatam Tayusima 32.35 átu atitamta; itaru, Utaashucheema 10.30 tsiyatsis nipta tatsamooru taaritamta.

²¹Yutaritshish siyaa kaseeyantspa, itaru wanasiriri taakus, yutaritshishee ichinguru ksingtsa. Ashkinaareesa, tputs yutarit taakana anin siyamun pakchusin, paziyarusin, yutaritshishirineetsini kasachtampasinaya.

Ashirucha, yuwari siyaa wanasiri taamaam waneeki anuritam payungtsa; nuw siyaa táshina.

Mishat, kurakawaats kuk payumaam wanichintspa

13 ¹Ashiriya, Isuschichis, mazinangtsa. ¿Apanllchichis tamaree nda kurakawaats kuk mazinachis? Nitaati kurak waana kinarang, nda; Apanll waana ínarangiya. Apanll gobernoom ichinguru ínarangiya. ²Ashiri kitsis mazinangtsa; kurakawaats kuk ngatintspa. Ngatkinaareesa, ¿antaati Apanllee kamachtamarini payukeezis? ndambaree. Itaru, kukoo kapeetkus, kurak siyaa wani-chiya. ³⁻⁴Watam Apanll gobernoo wayaranguwa tputseets napamaama. Kurakaw kuk payukinaareesa, mapiyus taatssa; siyaa kis napchiya. Itaru, yutaritanaari taakus, punirpatartis taatssa. Nitaati kurakaw wasundurur mangu taatareeja. Yutarit taakana anoo wanitariya, watam waana Apanll ashimaam wayaranguwa.

Yuw mang'patari taaku an ¿mayaa-ma kurakawaa púnich? Itaru, yuw nda mang'pa taaku, punichpasinaya. Ashiri nda punirpatis taamaam, mangiptis taangtsa. Ashkinaari, kurakawa siyaa kis chinachinllinaya. Putachazinllinaja. ⁵Ashirucha, kurakaa kuk payungtsa tina. Waneerundama átus, mangiptis taangtsa. Mangishish mapiyaam zandkush, ashiri itsinsaru taangtsa.

⁶Gobernu siyaa: Kurikiris pakich pananda; tákchu, siya panangtsa, pchindintspa. Apanll watam waana gobernoom ínaranguwa, kurikirimunis kchitakiya tputsee istamaama.

⁷Mishat, governu siyaa: Istanganda; tákchu, shingtsa; ngatintspa. Kurikee

yampaneem panangtsa átu shingtsa. Kurakawaa yámintspa; kukoo payungtsa; kurakaa chinangtsa; ksutangtsa. Ashirucha, kurakawaats kuk uru payungtsa; nuw siyaa táshina.

⁸Mishat, wanichintspa; nda tumashtamaam, misha tputsee chinamaama. Tputsee tumashtakinaaris, musásiri tuwapangtsa. Tuwapchintspa táyarus, tuwapangtsa. Ngutis ngichintspa. Tumashiris tuwapayarus mapiyngtsa. Itaru, tputspatashtis chinamaam urutamari chinangtsa; mapiyrintspa. Watam Apanll tputsee ichinguru chinangtsa atuwa. Ashiri tputsee kaap chinakinaareesa ashiru, Apanllee kamachtamarini tatsamootssa.

⁹¿Apanll kuku amka? Kamachtamarini yandamaa chinakpasa;

Ngutis tputsee pcharintspa.

Minpa kiz imbangartarintspa.

Maacheetsi shuchirintspa.

Tputsee mantsir tsiyatintspa. Tputsee ngichintspa.

Yuw tputs maachiri payukana anungaz ngutish tamararintspa,^a

Apanll kuk átcha. Mishat, ashpatam kamachtamarini arang taaritamcha.

¿Itaru, Isus amarangtamtaja? ¿Tputsee zurumarpatari chinakuch, tamaree Apanllee kamachtamarini kapeetchich? Pinasakcha. Ashiri shaanaatsi chinakish ashiritam tputsee chinangcha; tárangiya. Ashkupchi Isus tárangu anoo tatsamoochchi. ¹⁰¿Tputsee kaapa chinakinaarich, tamaree kiyung yachachich? Ashcheezich; tputsee zurumarpatich chinakuch, Apanllee kamachtamarinee ichinguru payuchchi. Ancha kizpur wanasiriya. Ashiri saanpatatis chinangtsa táshina siyaatsi.

¹¹Ashiri yuwaa waneeki anoo aranginasha payungtsa, watam zapshtayanlluwa. Sirú Isusoo mangoonarangus, Musá iyaa yamachiya, tárangitaatis, itaru natunaacha tutundkachiya izuuru tapachindamaama. ¿Ashiri tamaree ngutaritich taatararaw ashchich? Watam

^a 13.9 Tashitungarangu 20.13-15; 20.17 tsiyatsis nipta tatsamooru taaritamta.

Isusoom kusamaam tuwayamayanlluwawa. ¹²Yutaritshish kapeetpani. ¿Mayaama payuchich? ¿Mayaama Yashingush tachitchich? Ashiri taarasheetsini sirapuch izuuru kapeeteeruni taayani. Isus tamapari ashiru taarasheetsim kanee-sich chinayani tina, watam Apanllish urutamari wanasiri taachiniwa. Apanllish musápa taachini; itaru natumpa nish yutaritshishpanpat yapataruni taakani. ¹³Ashiri waamamari taakuch, karusamamari taakuch, imbangartamamari taakuch, yutarit taamamari taakuch, tputsee nambanambtangat ashkuch, tputsee tsiyantamamari taakuch, yutarita. ¿Mayaama ashchich? ¿Nitaati Apanll anoo kis naptar? nduni. Ashiri 'sinish taachini. ¹⁴Isusootsimari chinakinaaris, Isusush tuminungtsa. Saana zandkis anoo payurintspa; watsishaparee. Taarashis sirapuch chinarintspa; taarashish sirapchish tuminintspa.

Ashirucha, wanasiriri taangtsa nuw siyaa táshina.

**Mishat, siyaa táchintspa;
Apanllchichpatatis tayutaritarintspa;
nuw siyaa táshina**

14 ¹Nuwaa kuki mazinangtsa. Apanllchich tputs siyash kuskachu, siyaa chinangtsa; niyrintspa. Katungtsee tputs mangukinaariya, siyaa yuwis Apanllee kapung mangoonkis anis natsarintspa; tpazarintspa. ²Apaz siy: Apanll maacheetsi ichinguru katungtseem wayaranguwa; átus, wanuts ichinguru kis katungkus, itaru uwsha yuttam mangoonku, punirpat manguku, anumand natsarintspa. ³Tputs mangukta, siyaa niyrintspa; tpazarintspa. Uwsha nda chiya niyrchitamtiya. Siy Apanllee mangoonkus, uwsha Apanllee mangoonkitamta, ashiri tatsamootischa. Apanll siyaa kis washunand napkiya. ⁴¿Tamaree chiy nllitaritaa Apanllchichee yutaritcha táchich? Watsta; watam Apanll waana yasaruwa. Apanll waana wizpuririni panakiya mangoonamaama-ya. Apanllsha anoo tputs kis chinachi-

ya. Ashiri Apanllchichpatatis niyrintspa tina, watam waana Apanll tputsee yasachuwa.

⁵¿Mayaama zaree kanusshishimun xarachich? Min tputs ashpatam: Anush zaree patatamaam waritacha táta ashkiya. Mishat, tputs ashpatam: Anush zari patatamaam yutaritcha, táta ashkiya. Ashiri Apanllimun mangis chinayarus, yuwaa saana zandkis anoo shingtsa. ⁶Yuw tputs Apanllee mangoonku an: Anush zari patatamaam zandkeez; Apanllee ungirtapi áтана átu, an Apanlleem wanasircha. Nda anumun xaramaam siyaa tina. Yuw tputs Apanllchich katungtsee manguku an Apanllee wapparee táyaru, katungtariya. Apanllchich min wanutsee mapiyru katungku, Apanllee wapparee táyaru, katungkitamcha. Yuwartatam waani ashimaam zandku anuritam ashkiya; misha yuwartatam nda katungamaam zandku anuritam ashkiya, watam Apanllee mashkitamta. ⁷Ashkitaateeniya, watam ichinguruni Apanlleem taakaniwa. Nitaati Apanllchichich chaana chinakich anumunaja taakich. Itaru, Isusoomari chinakuni taakchi. Mishat, Isusoomtam tsipakich, ¿watam tsipakchuch, waana chiya Isus yamakuwa? ⁸Taaktaatani, Isusoo iy kurakartanicha; tsipaktaatani, urutari kurakartanicha. Ashiri taaktaatani, tsipaktaatani, antaati iyaa kasacheeja, nda. Watam kurakareemani urutari taakiya. ⁹Isus nuwamari kasipi átu waana tsipayaru, yusur támarangiya. Kchitatstaatani tputsini iyaa kasikiya. Tsipareetstamani tputsini, iyaa kasiktamcha Isusu. ¹⁰¿Ashiri mayaama chiy zuwanlleesich Apanllchichee natsachich? Watam Isusumun zuwanlliniwa. ¿Mayaama zuwanlleesich Apanllee tiptisiri yutaritcha táyaruch niyrchich? Watam Isus yusur kuskachu, Apanll tputsee ichinguru tuxiyekeyaru, mangoo natstayararu, waana Apanll chiya yasachuwa. ¹¹¿Apanll kuk amka?

Tputsee ichinguru kasichima.
Nda minamtiyam kasachina. Tputs

ichinguru, nuwaa; Shiy kizpurtishcha Apanllish, táchinllinaya nuwaatsi, tárangiya Apanlli. ¹² Ashirucha, Apanll chiyaa natstayaru, yasachiya. Ashiri waneeyantspa, tina. Apanll chiyaa: ¿Tamarangsa? táchparee. Ashiri Apanllchichpatatis yuwamand tputs taarashee nllitari payuku anumand niyrintspa; tina siyaatsi.

¹³ Mishat, táchintspa Isuschicheetsis; Apanllchichpatatis tuxararintspa; tina. Saanpatatis yutarit yaspatakinaaris, wanasireeja. ¹⁴ Napancha; Katungats ichinguru wanasiriya; Apanlleem mantsam wanindaja; atashina. Nuw Apanlleem mangoonkuri, mangishi itsinsaruri chinaranguri, anuri chinakina. Itaru, tputs: Yutaritazuwa, táyaritaa katungku, uwaam yutaritcha. Ashikpaz ashkiya tputsee tayutaritamaama. ¹⁵ Siysa yutaritshishush yapshturintspa. Mishat, Ash-
taa ktungangi, átus, uwsha: ¿Yutaritazuwa? titaa, katungkachu, paptsa siyamun Apanlle kasatpa tina. Ashkinaareesa, nitaati chinakeezis ashkis. Ashiri Apanllchichee yutaritarintspa tina, watam Isus uwaam kiyung kachiyanguwa.

¹⁶ Maacheetstaa patatamaam shiyaam wanasiritaa, itaru Apanllchich ndutama-
ta mangoonku an yutaritcha atinaari, siysa watsta tángtamtsa nda siyamun tputs xaramaama. Siyaam wanasiritaa, watsta tángtsa; zuwanlleetsis Apanllchichee tuxararintspa. ¹⁷ ¿Mayaamaja siy katungtsimand nambaptangat ashiksa? ¿Waamaam mayaam kapung tsiyataksa? ¿Antaati átis anumand Apanllish pshtutari-
rich? Itaru, yuwamand Apanll Waanaatsi Wani iyash pshtarangu anumand Apanllish pshtuchiniya. Apanll Wani yaanpa-
tatini mapiyrurini taamaama istakiya. Mishat, wanasiriri taamaam istakitam-
ta. Mishat, mangini kis taamaam istakitam-
ta. An watach ichinguru Apanll zandku anu. ¹⁸ Anuri payukinaareesa, Apanll siyaa kis napchiya. Tputs ksatam napchiya; siyaa nda yutarit tsiyatchi-
ya. ¹⁹ Ashiri anuri chinayarus shingtsa; sambaytarintspa. Apanllchichpatatis

washunand wanasiri taangtsa tina. Saan-
pata niyrintspa; mapiyrus taangtsa tina. Saanpatatis Apanlleem kizpurtamaam istangtsa; aranginasha mangoonangtsa tina. ²⁰ Apanlleem ichinguru wanasiri katungumaam tinaranguwa. Itaru, tputs zanaykinaari, tamundarintspa; tuxararintspa. Ashkeesa ashirus, Apanlle kuk kamaparee kasachiya. ²¹ Ashiri Apanllchichee chinakus, tuxaratareema átus, mangungtamtsa natumasamta. Ipunarus katungkus, zanaykinaari, siysa ktungintstampa. Mishat; kshaa pakich waa-
kuri, waritakcha, watam nda karusakina-
wa; titaatis, uw zanaykinaari, warintspa. Maacheetstaa mangishis chinakus, Ashkuri, Apanllchichee yaspatareema; atinaaris, mapiyngtamtsa. ²² Mangishis chinayarus, ashiri yuw wanasiri anoo ktungangtsa. Patatamaamtam yuw siyaam wanasiri anoo ptatangtsa. Itaru, Apanlle mashangtsa. ¿Tamacheezi? tángtsa. Watam Apanll iyaa pakuwa. Ashiri mangishis nda xarakus, katung-
kus, misha maachi patatkus, waritariya.

²³ Itaru, chiy: ¿yutaritazuwa? átuch, zanaykuch, ashtaa katungkuch, ashtaa patatkuch, yutaritcha. Watam ¿Apanlle yutaritazuwa? titaatich, chaantarisha ashikchiwa. Yuwaa chiy ¿yutaritazuwa? átiche an chiyaam yutaritcha. Ashiri siy xarakinaareesa, watsta tángtsa.

Ashirucha, Apanllchichpatatis tayutari-
tarintspa; saanpatatis wanasiri taangtsa; nuw siyaa táshina.

Mishat, táchintspa; Apanllchichee niyrintspa; wanasir napangtsa. Isus iyaa chinarangu, wanasir naparangu siysa shingtamtsa; nuw siyaa táshina

15 ¹ Ashiri iy Apanlle kuk kapung yasaruni, uwsha Apanllchich ndutam Apanlle kuk yasaru, ashpa-
tam mamarpaku, ashiritaa istachinipa. ¿Chaana zandkich anootsim mayaam-
shta ashtachich? Ashimaam watsta táchiniya. ² Uru saanpatatis Apanllchich-
patatis istangtsa. Nda yutaritamaama; aranginash Isusoo mangoonamaama

chinangtsa. Mang' kis taap átus china-kus, istangtsa. ³Nitaati Isus yuwaatsimari waana zandarangu anootsimari tuminarang, nda. Waanaatsi nda china-ku, Waparee chinaku, iyaam istamaam kukoo payurangiya. Payurangu, tputs-sha Isusoo natsaragana. Apanll kuk anoo kamankiya;

Tputs shiyaa tpazamaam zandkusin, nuwaatssha tpazaktamsinaya,^a tárangiya Isusu.

⁴Apanll mangutari kukoo tuyandara-geeeja, nduni. Iyaam mangoonamaam mangeetsini p'tsimaam sirú tuyandara-geeyi. Ashiri siya istangtamtsa saanpatatis. Kiyung kachiykuni, Apanllimun kuk kizpurtakani. Apanll kuk mangeetsini p'tseeku, iysha nda sambaytakaniya. ⁵Mishat, Apanllchichpatatin Apanllee mangoonamaam istapana siyaa aturi, uru nuw siyaam Apanllee mashkina. Apaa, shiy uru nda sambaytamaam istangcha. Mangeetsini yarangcha. Ashiri Romshucheewaatssin mangooz waanandari chinamaam istangcha, Apaa; waanpatatin wanasiri taamaama istangcha. Iparish Isus tamapari ashiru taachinllinpa; Apanllpa tsiyatkuri tina. ⁶Ashkachinaareesa ichingurus minamari mangooz chinakus, Apanllee ungirtatssa. Wanasir kis taatssa Apanlleema. Apanlli watacha Isus Wapariya; iycha Kurakarini.

⁷Ashiriya, Apanllchichee niyrintspa; wanasir napangtsa. Isus iyaa chinarangungu, wanasir naparangu siya shingtamtasa. Ashkachus, tputssha Apanllee: Shiy kizpurtishcha, Apaa; taachinllinaya. ⁸¿Chiyaa kis chinapi átu Isus tamarangeeja? Isus Utaáshuchee kinarangu, Apareetsi kuk ichinguru tuminchima, átu, Utaáshucheesha istarangiya; ¿watam Apanll Utaáshuchee zitaminarini istachintspa, táraguwa? ⁹Arapcheestam nayaniku, tapachinda-maam kusarangiya. Apareetsi mangoo-

neersin, ungirtapana átu, tapachinda-rangiya. Apanll yandamarini yuwaa arapich mangoonchinllina anoo wasina kamanirangiya.

Apaa, yuwamand ashirangish anumand nuwshat ichingarupa tsapurunas tputs shiyaa surish shambatchinlliniya;^b táragiya.

¹⁰Minshat:

Arapcheewis ichingarus tsapurnas-shuchis Apanllchichis washunand Israelchichpat mangis kis taangtsa;^c táragiya Móysisarini. ¹¹Minshat: Arapchis ichingurus, Apanllee ungirtangtsa. Tsapurunasshuchis ichinguru ztaru Apanllee ungirtangtamtsa, táragiya. ¹²Minshat, Isáysarini táragiya:

Apanll Dapiyarinchichee nlluranur yusur kizpur kurakaam ínachiya. Tsapurunasshuchee taakana anoo ichingaru tputs wamari ksutku taachiyaya. Tputs arapcheewataatin uwamun mang' tatchinllinaya; táragiya. An Isusoo, táragiya. Ashirucha, táshina; napa: Isus Waparee kuk tumineeru, iyaa istarangu, siya shingtamtasa, Apanllchichee niyrintspa tina.

¹³Ashiriya, Apanlleem kutakus, uru mangis kis taatssa. Apanll siyaa mangedtsis p'tsichparee shambatamaama; uru Apanllpa mapiyrus taatssa. Apanllee mangooneerus ashitssa. Mapiym payukus, Apanllimun Wani wizpuririni kishaparee kutatssa Isusoom kusamaama. Na wapari siyaa waneeyana.

Natsha, yuwaa nuw tayaspatarangi anoo pakich kamanchintspa. Apanll nuwaa kamanishini, táragu, nuwsha siyaa arapcheetsis Isusoo kuk kapung kamanirangina

¹⁴Itaru, nuw siyaa Isuschicheetsis yasaktana; nuwaa kuki kapeetcheezis ndambaree, watam mangiptis taaksawa.

^a 15.3 Nishuri yuwartatam Salmo 69.9 átu atitamta. ^b 15.9 Nishuri yuwartatam 2 Samuela 22.50 átu atitamta. ^c 15.10 Nishuri yuwartatam Tayusima 32.43 átu atitamta.

Saanpata wanasir chinatssa. Kamanirangi anoo mangoonkinaareesa, aranginasha mangoonatssa. Sheerus, Apanllee kuk itsinsashtis tayaspatatssa. Ashirucha, siyamun mangi kisa.

¹⁵Itaru, na in Isusoo kuk tuyandakuri, itsinsaru tsiyatkina. Siyaa mangoonap aturi, mangeetsis p'tseekina. Ashirucha, zapan kamankina. ¹⁶Apanll nuwaa: Arapchee tputs tsiyatssis wanasirimshee kamanishini Isusootsi, táyaru, nuwaa kamachtarangiya. Nuwsha nda ngataranguri, Isusoo izuuru kamankaturi, arapchip zapan naparangina. Ashkuri, siy arapchitaatis Isusoo mangooneerus, Apanllsha Wani taarasheetsis izuuru yareeru, Apanll siyaa kissha napchintsa. Nuwsha siyaa Apanllee yámandayaruri, Neewa, Akaa, watacha shiy tputsirish, táyaruri, Apanllsha siyamand mang'ksachiya.

¹⁷Ashirucha, anumand nuwsha mangi ksachtamparina. Isus nuwaa istayaru, nuwsha Apanlleem kapung mapeeranguri, siy arapchis tputsis Apanllee mangoonarangus, nuwsha anumand mangi ksakina. ¹⁸⁻¹⁹Itaru, nuwaaanaatsi ungirtakeezi. Nitaati nuwaanamuntaja wizpuriri ashirangi; Apanllimun wizpuririni ashirangina. Apanllsha Wani nuwaam Apanllee wizpuririni panayaru, izuuru Isusoo kamanirangina. Apanllee kuk payukuri, ashirangina. Tputsee ituyamata, Yashingoo tashitungata zapan ashiranguri, Apanllee wizpuririni tuyamandarangina. Tputssha pakeersin, mangooneersin, Apanllee ungirtarangana.

Irusarinush káyananlluri, ichinguru yakat iturpirangina. Minush yakat kamanta, minush yakat kamanta ashiranguri, Isusoo kamaniranguri shuneyaranlluri, kung Irírikush kasarangina. ²⁰Uru mangishi chinaranguri, Yap Isusoo nda mazintarana amb tayaspatati, táranguri amb kapung xiyrangina. Nuwma kuseeruri, tayaspatapi turi, nda sambaytarangina. Yamazayaruri,

nuwma arapchee tputs Apanllchicheem ínapi aturi, ashirangina. ²¹Ashiranguri, Apanllee kuk nuw tuminurangina.

Pakchusin, mangoonachpasinaya.

Nduntaa sirú anoo mazinamaam

zandarangusin,

natsha kizpur wanasirimshee

mazinachinllinaya,^d

tárangiya Apanlli. Ashiri anuritam tuminurangina.

²²Ashiri Apanll kuk kamanpi turi, amb kapung xiyranguri, mapeeranguri siyap kusamaam pinasarangina. ²³Itaru, nat'sha nish iwaparanguri, Ispániyap tsap pangati turi naakchuri, siyash napchitamparina. ¿Wanipa masach mangu-tari tushiyannll siyangaz chinachinaw ashkuri? ²⁴Na nuwaam xarashish ndunshacha. Ashirucha, Ispániyap naakchuri, siyash napchima tina. Siyapa natum ipuntaranguri, siyaa nizeenlluri, arangeemsha naachina. Siy nuwaam kurikpat istayaru, Ispániyap nuwaa zanganitssa. ²⁵Itaru, natumamam Irusarinap naachima. Amb Apanllchicheewaattssin istaati turi naachina. ²⁶Masedonashchi tputs nuwash kurik zangankana. Akáyshuchtam tputs kurik zangankanaya. Irusarinash Apanllchich pukireew taarana anoom istayani, táyarusin, kurik zangankana. ²⁷Irusarinshucheewaattssin tumashtakanaya, watam Irusarinshuchimand kuk Apanllee mangoonanganawa. Utaáshuch Irusarinshuchi arapchee tayaspatarangu, ¿tamaree arapich uwsha Utaáshuchee nda istach? Irusarinshuch pukir taaru, yuw Apanllee mangoonku an urkir pishtarangu, ¿maypat katungeech? anoom kurikee zangankachinllina nuwashu. Yungpari-pa ashkachinllinaya.

²⁸Ashiri zuwanllee, kurik Irusarinshuchee tputs uwish panayanlluri, Ispániyap arangirisha napkaturi, siyash matayeruri, napchintspa. ²⁹Siyap napkaturi, Isusoo mangoonamaam Apanllchichpatatani istachinipa. Isus uru iyaa

^d 15.21 Nishuri yuwartatam Isáysa 52.15 átu atitamta.

kizpur istaku, ¿ashiri tamaree Apanllee kuku nda kis ipunchini? Kisshaparee kamanchina.

³⁰Itaru, zuwanllee, nuw Isusoo kuk kamankaturi, kizpur ndaj aturi, nda sambaytakina. Ashiri siy nuwaam Apanllpat tsiyatandama; nuw siyaa istanda táshina; Isusumun chinakus, tsiyatkus, istangasinda. Watam Apanll Wani iyash taaru, Apanllchichpatatani kizpur chinakiniwa. ³¹Apa, Yashingchi-chi Utaáshuch tsiyantayarusin, Paporoo pcharusinapa; napangcha; tángtsa, Apanllpata tsiyatkus. Mishat, Irusarinshuch Apanllchichee istakaturi, nuwaa wanasir napchinnlpa tina. Anoomtam tsiyatangasindama. ³²Ashkachinaareesa, Apanll nuwaa istakchu, waana zandku, siyash musá napchintspa. Siyash kuska-churi, mangi kis napchina; kis ipunchini-pa. ³³Ashiri Apanll siyaa istachapantsa; mangeemis mapiym panachapantsa tina. Siyaam Apanllpat tsiyatkuri, Romshucheem shingcha, Apa, tina.

Ashiri wapparee yuwaa ashchi anoo kamaneena.

16 ¹Na minootssha siyaa Isuschi-cheetsis kamanchintspa, Izarich Piip siyash kuskachu, siya istangtsa; wanasiri napangtsa. Sídarsuchcha tsap Piipi. Piip uru Apanllchichee kapung istarangiya. Wash uwi nee kirak zangan-kina. ²Na, itaru, siyash kapung taakchu, wanasir napangtsa. Isusumun Piipee izartanicha; ashiri istangtsa. Apanllchichee ashimaam uru wanasiri. ¿Uwsha Piip tputsee wanipa istaranga? nuwaats-tam istarangiya. Istamapaniri taakiya. Ashiri Piip siyaatssha istanda atinaari, istangtsa; ngatintspa; tina siyaatsi.

³Mishat, nuw siyaa Romshucheetsis kizpur chinakina.

¿Tamarimta, zuwaa Akilaa? ¿Izannllish Piríska wanasir taar? Nuw siyaa kiz-pur chinakina; mbizakeezi. Siy nuwaa kapung istaranga Apanllee kuk kamani-maama. Washunand ipunaruni tayas-patarangini. ⁴Shiy nuwamand kamini nda tsipaneetsis pachindar Angus, nuwaa

kapung tapachindaranga. Anumand kapung wapparee atina. Apanllchich ichinguru wapparee atitamsina.

⁵Siyashchee Apanllchichee ichinguru chinakina; siyash Apanlleem shaniykana anoo atina.

¿Tamarimta, zuwaa Ipíntoo? Nuw shi-yaa kizpur chinakina. Sirútari Ásiyash tsap Isusoo kamaniranguri, shiy masa ichtarush Isusoo mangoonarangsha.

⁶¿Tamarimta, izaree Mariyaa? Shiy Romshuche kapung Apanlleem kuk ista-rangush, nuw shiyaa chinakina.

⁷¿Tamarimta, zuwaa Ádarónikoo? Shiyaa chinaktana. Izanlleetstamtish chinakina. ¿Tamarimta, izaree Jóniyaa, taarish? Utaáshucheetseerus, siyaa chinakina. Siyma sirú Isusoo mangoonara-ngus, siyamun kushis nuwsha mangoona-rangina. Isussha wámachtashi ichinguru siyaa chinakanaya. Isus wamin siyaptari iyaa tumanarangana. Siyaa mbizakeezi.

⁸¿Tamarimta? zuwaa Ámbaríto. Shi-yaa kizpur chinakina. Isusumun shiyaa zuwaa tina.

⁹¿Tamarimta, zuwaa Órpánoo? Kis shi-yapat Isusoo kuk kamankatuni xiyrangini. Shiyaa mbizakeezi, zuwanllchee.

¿Tamarimta zuwaa Estaka? Shiyaa-ts-tam kizpur chinakina.

¹⁰¿Tamarimta, zuwaa Ápirísa? Shiy Isusoo izuuru mangoonarangush, nda sambaytarangush, nuwsha anumand shi-yaa kizpur chinakina.

Mishat, Áristóbulórineetsis wipis ichinguru chinakina. ¿Tamarimsa siya; taaris?

¹¹¿Tamarimta, zuwaa Erodiyona, taarish? Utaáshucheetsis kizpur chinakina.

Mishat, Nársísarineetstamtis wipis chinakina. Yuwis Isusoo mangoonarangis anootsis kizpur chinakina. ¿Tamarimsa siya; taaris?

¹²¿Tamarimta, izari Trifena? ¿Izari Trifosa, tamarimta? ¿Taaris? Siy Isusoom kuk tarawaktakus, kiyung kachiykus, nda sambaytakusa. Ashirucha, nuw chinakina.

¿Tamarimta, izari Persideya? Shi-yaa chinaktamana. ¿Isusoom kuk

nduntam sambaytakush, kiyungutam kachiyakshawa?

¹³ ¿Tamarimta, zuwaa Arójó? Shiyaa chinakina. Uru Isusoo kuk kis kaman kaman ashkush, nda sambaytaksha. ¿Aneershawa, wanasiri taar? ¿Ataa, tamarimta? ¿Taarish? Shiyaa aneereetsich tamaparee ashirina.

¹⁴ ¿Tamarimta, zuwaa Asígarítu? ¿Zuwaa Pírigon, tamarimta? ¿Zuwaa Jéramisa, tamarimta? ¿Zuwaa Pátarup-sa, tamarimta? ¿Zuwaa Jérama, tamarimta? Siyaa ichingurootsis chinaktamana. Tputs Apanlleema ichinguru siyapa shaniykana anoo chinaktamana.

¹⁵ ¿Tamarimta, zuwaa Piróroku? ¿Zanllshawa? ¿Zari Jóriya, tamarimta? Siyaa chinakina.

¿Tamarimta, zuwaa Nériyoó? ¿Izarshawa? ¿Taar? Siyaatstam chinakina.

¿Tamarimta, zuwaa Oribee? Siyaa chinaktamana. Tputs ichinguru Apanlleema kuku siyapa shaniykana anoo chinaktamana.

¹⁶ Uru Apanlleem shaniykus, kis ipunangtsa; saanpata wanasir napangtsa. Saanpata chinangtsa.

Nishuch tputs ichinguru Apanllchichini shaniytarana anu, minupsha kung, minupsha kung shaniykana, siyaatstam ¿Tamarimta? tánaya. Siyashchee chinakanaya; mbizakazinllinaja.

Mishat, táchintspa; tputs k'kuz piyari tayaspatakana anoo chinarintspa tina siyaatsi

¹⁷ Isuschichis, mangiptis mazinangtsa nuwaa kuki. Tayaspatampanputs paptsa. Apanlee kuk nda itsinsaru tayaspatakana; nda Apanlee kuk payukana. Apanllchichee tuxarakanaya. Tayaspatampanputsee kuk payuksin, nda waanpata kis taakana; natsatstar ashkana. Itaru, nuw Apanlee kuk siyaa itsinsaru tayaspataranguri, siyaa mangoonarangsa. Uwnaarsin tayaspatampanputs Apanlee kuk wanasireeja tayaspatakana. Ashiri waatssin kuk mazarintspa; anpat ipunintspa. Nambeerus zanganingtsa. ¹⁸ Nitaati

Kurakareetsini Isusoo chinakazinllinaja nduni; kukoo payukazinllinaja. Waana zandkana anootsim chinakana. Kuk putitssincha; tayaspataksin ksanaa kischea mazinaktachchi. Itaru, piyari tayaspatakana; waamatarí tiptsireem ínapani atusin, siyaa tamapingakanaya. Tputs nda mang'pat taak'sin, Apanlee kuk ngichimaam kamirana. Ashiri paptsa; anoo kuku payurintspa tina.

¹⁹ Itaru, nuw siyaa yasatana; kapung mazarangina. Isusoo kuk payuktischa. Ashirucha, mangi kisa. Ashiri yutaritshishee mapiyngtsa; wanasirimsheetsimari mangoonangtsa. Ashtapana aturi tina.

²⁰ Ashkinaaris, Apanllsha siyaam uru mapiym panachiya. Siyaa saanpatatis minamarisha mangooz chinatssa. Yashingoo musá kanaxakpaz ashkachus, siyaa izuuru kasikastachis. Ashiri Isus Kurakarini siyaa chinaku, uru istachintsa. Ashirucha, tayaspatampanputsee izuuru watsta tángtsa; nuw siyaa táshina.

²¹ Mishat, táchintspa; Timotey siyaa chinakiya; nuwapa ipunaru Apanlee kuk kamankiniya. Nish zuwanlli Utaáshuch taaritamcha; sura Oróssiya, misha Jasóna, misha Sosípateru. Siyaa chinaktamanaya. Ashpin nuwash taakanaya.

²² Na uwsha Tírsiyusha yuwaa siyaa chinaku anoo kamanchiya.

¿Tamarimsa, siya zuwanlee? Nuw Isusumun siyaa chinaktana. Yuwi nee kirakaa yandaki ani Tírsiyutana. Papor nuwaa tuyandakiya. Wapparee.

²³⁻²⁴ Mishat, nuwsha Papori siyaa kamanchintspa; Kay siyaa chinaktamcha. Kayushcha pang' taakshina; nuwaa ishinkiya. Kayush nishuch tputs pang' Apanlleem uru shaniykana. Minshacha, Irásot siyaa chinakcha. Irásot watacha nishuch yakat kurikee ksutama-pani. Kowárot zuwanllis Isusumuna chinakitamta. Watamaritcha tputs tsiyatsis siyaam zanganku anu.

²⁵ Ashiriya, Isuschicheetsis Apanlleetsimari ungirtayani tina. Siy Isusoo mangoonaranganu, Apanllsha siyaa kapung istachintsa kizpurtamaa-

ma; ndusha Isusoo kuk sambaytaksa, nduni. Sirútamas Apanll tsiyatssis wanasirimshee kamapshirangiya.^a Itaru, na Isus kusarangu, mangoonee-nicha. Natpuru Apanll nuwaa kamach-tarangu, nuwsha tputsee kamankashina.²⁶ Apanllush yandamarini sirú tsiyatssis wanasirimshi kamanimana kamanirangtaa, nda izuuru kamani-rangiya. Itaru, natunaa tputs Isusoo izuurasha mazinakatssincha. Watam Apanll urutari taaranguwa, ashirucha mangush chinarangu anpur kamani-

mapaneem tuyandarangiya. Ipareetsi mangoonpana átu tsiyatssis Isusush zanganirangiya. Nat'sha ichinguru tputs ztaru arapchitaatin natunaa mazinakatssincha. Ashiri zapanis mangoonaksa; kitsis mazinaksa tsiyatssis wanasirimsheetsi.²⁷ Ashirucha, urutamari Apanlleetsimari ungirtayani tina, watam Ísúkirísut iyaam Waparee tuyamandaranguwa. Zuwanlee, anuri mangoonangtsa.

[Wapparee, zuwaa Romshuchis. Watamcha nuw kuki.]

^a 16.25 Daniela 2.18 tsiyatsis nipta tatsamooru taaritamta.